

WANTOK

24 pes

Namba 1,227

Wik i stat long Tunde Desemba 30, 1997

50 toea

MUTRUS KANAGE
BILONG DISPELA WIK
KATIM NA SALIM IKAMI

KANAGE

"Em nau, narapela wik bilong mi ken"



• Kanage na Agnes i pren pas taim tupela i stap long gred 5 na 6. Tupela stap long Kemenave Komyuniti skul long Henganofi distrk. Tasol Agnes wanpela i pas na go long Goroka Hai skul.

Foapela yia longf hai skul na gro bilong Agnes i kamap narakain. Nus pes na bodi bilong Agnes i kamap stret. Mekim na Kanage i ting olsem nogut narapela man i autim tiket bilong Agnes, na em bai lus. Orait em hatim lain bilong em, na ol bungim pe. Wanpela mun bipo long Agnes i greduet, of i baim pinis Agnes.

Long de bilong greduesen, Kanage kisim ka i go long witnessim. Long skul, wan klas bilong Agnes i amamasim greduesen wantaim wanpela pilai drama. Drama i sut long pasin bilong ples long baim meri.

Kanage kamap long skul na kirap nogut long lukim sampela lain i bilasim Agnes. Na singsing i go long givim long man. Long hapsait, em lukim sampela lain i kisim pe i kam long baim Agnes. Kanage lukim olsem of i laik salim Agnes long narapela man na kisim pe. Em i no kia yet olsem ol studen i mekim pilai drama tasol, nogat. Bel i sut nating na em i no wet.

Kwikitaim em ron i go stret namel long drama lain, na singaut: "You people are so stupid! I wife it Agnes with 10 pigs, two muruks plus 500 pound!" Na em i holim han bilong Agnes na pulim em i go aut. Na kisim long ka i go long ples.

Mekim na ol manmeri i paul. Agnes tu i paul na i no kisim setifiket wantaim ol kago bilong em. Em i go nating long ples wantaim bilas bilong drama long skul.


WINA BILONG DISPELA WIK EM
Jim Ngalye
ISTEN HAIENS

Sapos yu ting yu gat wanpela gutpela pani stori, orait katim hap pepa antap i makim "Mutrus Kanage bilong dispela wik" na salim wantaim stori bilong yu i kam long **WANTOK NIUSPEPA, P.O. BOX 1982 BOROKO PNG.**

Putim nem na adres bilong yu long pas na bai yu gat sans long kamap wina bilong "MUTRUS KANAGE BILONG DISPELA WIK" na winim wanpela praiz, SANS, YAH!

Stori na nem bilong yu bai kamaut long wanwan wik so noken lus tingting long baim Wantok niuspepa na painimaut!

SEKIM NEM BILONG TUPELA ARAPELA WINA LONG PES 11 na 12



Skate laik kamap 'dikteta': Haiveta

Praim minista i mas kisim sas tu bilong mutini olsem Difens Fos sas Jastis Mark Sevua, husat i bin harim kot na salim 5-pela soldia i go kalabus i tok

LEO WAFIWA i raitim


PANGU Pati lida Chris Haiveta i sutim tok nau long Praim Minista Bill Skate olsem pasin em i mekim long tekova long Difens minista i olsem em i laik kamap dikteta gavman.

Olpela Deputi Praim Minista i mekim dispela toktok long Krismas De toktok bilong em, em i bin kamap long EM TV.

Em i tok praime minista i mas kisim sas tu bilong mutini olsem Difens Fos sas Jastis Mark Sevua, husat i bin harim kot na salim 5-pela soldia i go kalabus, i bin tokaut.

Mista Heiveta i tok praime minista wanpela em nau i bosim nesanel sekyuriti aninit long Difens Ministri. Na wok bilong em olsem siaman bilong Nesanel Sekyuriti Kaunsil, na tu olsem Komanda in Sief bilong Spesel Fos Yunit (SFU), na olsem siaman bilong Nesanel Eksekutiv Kaunsil.

Mista Heiveta i tok: "Long kisim opis bilong Minista bilong Difens, em i rausim pinis wok bilong sekim wanpela na narapela. Sapos em i larim yet Thomas Pelika olsem Minista bilong Plis, em bai



• Chris Haiveta.



• Praim Minista Bill Skate.

gutpela.

"Nau i luk olsem em i givim olgeta pawa long em yet na i laik kamapim wanpela kain diktetasip gavman" em i tok.

Haiveta i tok wok bilong praime minista long Sandlain hevi i bagarapim stret Papua Niugini Difens Fos (PNGDF).

Em i tok Skate i bin sapotim ol soldia insait long PNGDF wantaim ol manmeri long ol setelmen bilong Mosbi long bikhet long taim bilong Sandlain hevi. Bihainim dispela na Sandlain enkwairi i kamap, Difens Fos Bod ov Enkwairi i kamap, na mutini kot we ol memba bilong PNG Difens Fos i stap kalabus nau i bin kamap.

Em (Skate) i sanap olsem wanpela top lida bilong egensim olpela gavman. Tasol taim ol arapela memba long

Palamen i poinim finga long em, em giaman olsem wanpela gutpela lida bilong bihainim lo, na singautim olpela Praim Minista Sir Julius Chan long risain.

Haiveta i tok long mutini jas, i gat tok nau olsem Mista Skate i odarim ol soldia long mekim wanem samting ol bin mekim. Na i gat inap evisens olsem praime minista bilong nau i bin kisim tok-save tupela de bipo long operesen we i no bihainim lo i kamap. Tasol em (praime minista) i nobin mekim wanpela samting long stapim. "Sapos dispela i tru, Praim Minista tu i mas kisim sas bilong mutini."

Mista Haiveta i askim praime minista long kamapim gen Difens Fos Bod ov Enkwairi aninit long siaman bilong jastis Timothy Hinchliffe "long soim publik olsem praime minista i no mekim pual pasin".

INSAIT	• 5-pela soldia i kalabus long mutini i apil egensim disisen bilong Jastis Sevua ■ p3	• Wok painimaut soim olsem 1997 i no gutpela yia bilong PNG ■ p4	• Wewak haus sik kisim nupela ambulens ■ p7	• Goroka Lahanis pilai egensim ol Kumul selekta long wansait tumas ■ bek pes



MUTRUS

MAJOR SPONSA BILONG RAGBY LEAGUE INSAIT LONG PAPUA NIUGINI


GOVERNMENT WARNING: SMOKING IS DANGEROUS TO HEALTH

WMIAM

TOP 20

This Week!

L/W	T/W	SONG	ARTIST
2	1	MAI TAURI AU	KABANI
1	2	LESE MORI	AZZIMBAH
3	3	FROOKS LONG MI	AZZIMBAH
4	4	J'JUSTINA	LEO WALILING
5	5	NOQUI-TAU	KABANI
7	6	OVAVINE	AZZIMBAH
6	7	ERE BINI TU	KABANI
8	8	KEPOKO	HIRI BAND
11	9	UNITY	F. TADOIN.N.JOHN
12	10	SWEET SOMETHING	APRENTICE
13	11	ToBEST	KANAI PINERI
14	12	BR. BOB MARLEY	APRENTICE
10	13	OPERESSIN RAUSIM	K. PINERI
15	14	DEDICATE MY LOVE	K. PINERI
11	15	AZZIMBAH	AZZIMBAH
18	16	HILSIDE	AZZIMBAH
16	17	SHERRY	SERU SEREVI
17	18	BOMANA	AZZIMBAH
0	19	UWAHO	HIRI BAND
19	20	KALUNGE	WILLIE TROPU



PNG FM PTY. LTD.
Trading as
NAU FM
and
YUMI FM

P.O. Box 774,
Port Moresby
Papua New Guinea
Ph: (675) 320 1996
Fax: (675) 320 1995



Bomana haus kalabus amamasim nupela senis
• Ol kalabus lain bilong Bomana haus kalabus i bilas long tum-buna stail na danis long amamasim kamap bilong nupela haus kalabus long stat bilong mun Novemba, 1998. Dispela nupela haus kalabus i bilong ol bikhet kalabus lain. Planti manmeri na pikinini wantaim ol kalabus lain i bin stap insait long dispela amamas. *Poto: Ivan Bayagau.*

Sekyuriti fos wari long ol nupela pait samting sua long Bogenvil

Ol sekyuriti fos long Bogenvil i tokaut olsem sampela nupela samting bilong pait i stap nau long Saut Bogenvil, em ol i bilip sip i karim i go long ailan long taim ol ovasis soldia olsem bilong Nu Silan, Ostrelia na ol liklik ailan kantri i stap lukautim ailan aninit long truce agrimen.

Komanda bilong PNG-Defens Fos, Leo Nuia i tokim Praim Minista Bill Skate na Praim Minista bilong Solomon Ailan, Bartholomew Ulufa'alu long dispela samting long Loloho.

Mista Nuia i tok ol dispela nupela samting bilong pait em ol sekyuriti fos i lukim long saut wes Bogenvil eria.

Nogat planti manmeri isave long

dispela. Wanwan manmeri husat i save i pilim pret liklik. Olsem taim Praim Minista Skate i kam bek pundaun long Mosbi na tok, "planti manmeri i stap wantaim pret yet, tasol em i gutpela long lukim wok i go het long bringim bek gutpela sindaun long ailan".

Mista Skata na Ulufa'alu i bin bung na amamasim krismas ong Bogenvil. Astingting bilong dispela em long soim Melanesian pasin na bilip bilong Solomon Ailan na PNG long stretim hevi long Bogenvil ailan.

Tasol wanpela samting em tupela bikman bilong Bogenvil Revolusinari Ami, Sam Kauona na Joseph Kabui i no kam bungim tupela praim minista.

Nu Ailan bai saplaim yet helpim kaikai long nu yia

NEVILLE CHOI i raitim

WOK bilong givim helpim kaikai na saplai long ol pipel bilong Nu Ailan provins, huat i kisim taim long hevi bilong bixsan, bai go het yet long nu yia taim.

Provinsal Edministreta Kenel Lima Dotaona, i tok wok bilong saplaim kaikai long ol pipel bai go het taim 150 ton rais em Nesenel Disasta Komiti i promis long givim i kamap.

"Mipela kisim toktok i kam long Nesenel Disasta Komiti olsem mipela (NIP) bai kisim 150 ton rais saplai. Dispela saplai i mas kamap long tripela de i go pinis, tasol mipela i no kisim yet," Kenel Dotaona i tok.

Edministreta i tok ol i wetim tu long kisim saplai bilong ol wel bilong

kukim kaikai em James Barnes faktori long Madang i bin promis long saplaim.

Saplai bilong rais i sapos long kamap long Kavieng bris long las wik Fraide. Taim dispela saplai i kamap, provinsal disasta komiti i plenim pinis long saplaim dispela kakai i go long ol pipel inap mun Mas bilong yia 1998.

Kenel Dotaona i tok ol i yusim sampela edministresen mani bilong Namatanai Distrik long baim sampela rais na saplaim long ol pipel long Namatanai husat i kisim bagarap long bixsan.

Em i tok nau yet em i no kisim wanpela ripot i kam long Nesenel Disasta Komiti sapos ol bai kisim sampela moa mani long karimaut go het wok bilong helpim pipel long neks yia o nogat.

PLIS RIPOT

KIMBE: Long Krismas wiken, tripela man i go insait long wanpela haus long setelmen klostu long Kimbe taun, na laik bagarapim wanpela yangpela skul meri, husat i slip wantaim mama bilong em. Tasol kwiktairim ol dog i singaut na tripela man yai ranawe.

Dispela samting i bin kamap long Fonde nait, long samting olsem 2 klok moning.

- Long sem nait yet, tupela stilman i go insait long wanpela tred stua na ranawe wantaim ol kaikai we kos bilong ol i winim K100. Ripot i tok papa bilong stua na famili i bin go kaikai wantaim narapela famili taim stilpasin ya i kamap.

Taim ol i kam bek, ol i lukim windua bilong stua i op. Ol i go insait na lukim sampela bisket wantaim rais na tinpis i no stap. Papa bilong stua i bilip olsem laki na ol i kam bek kwik. Sapos nogat, bai ol raskol i ranawe wantaim olgeta kaikai.

GOROKA: Ripot long dispela wik i tok 6-pela memba bilong wanpela famili long ilten Hailans provins i dai bihain long ol i kaikai wanpela posin talinga long Krismas taim.

Dispela famili i bilong ples Aviera long Kainantu, Isten Hailans provins. Na dispela birua i bin kamap long Fraide Boksing De, bihain long tripela bikman na tripela pikinini - olgeta i dai sampela aua bihain tasol long ol i kaikai dispela talinga.

Tupela i dai long Kainantu haus sik, na narapela 4-pela i dai long Goroka haus sik. Na namba 7 memba, wanpela yangpela meri husat i gat 11-pela krismas i sik nogut tru. Na stap nau long Goroka haus sik, aninit long lukaut bilong ol dokta.

Wanpela memba tasol bilong famili husat i no kaikai dispela talinga em papa bilong famili. Em i no bin stap long ples long dispela taim.

MT HAGEN: Long Westen Hailans, wanpela meri i stap nau long haus sik bihain long em i kaikai posin talinga. Dispela meri i bilong Warakar eria long Westen Hailans provins. Na em i bin go slip long Kunjip Nazarene Haus sik long las wiken. Ripot i givim nem bilong dispela meri olsem Kes Dyrie bilong ples Koskala.

Ripot i tok Kes i bin kisim sampela talinga klostu long bus long haus bilong em. Na karim i go long haus, kukim na kaikai. Sampela aua bihain em pilim bel i pen na stat long traat. Kwik taim ol kisim em i go long haus sik. Na nau em i stap orait nau aninit long lukaut bilong ol dokta.

Krismas em taim bilong talinga long hailans rijon. Na ol pikinini long dispela skul holiide de taim save kisim ol talinga na salim arere long rot.

GOROKA: Plis long Isten Hailans provins i painim pinis wanpela faktori bilong wokim gan long las wik. Faktori ya i stap long Okapa distrik bilong provins.

Plis ripot i tok i bin gat komplem long dispela faktori. Na spesel tas fos bilong plis i go insait long ples na painim dispela faktori, we i save mekim ol gan. Plis i kisim 8-pela gan em ol i wokim pinis long faktori, wantaim 27 barel bilong gan, 11-pela bat o as bilong gan, 25 emti katres kontena, tripela emti Ar 15 raifol sel, na sampela moa pait samting.

Ripot i tok ol lain insait long faktori i lukim plis i kam na ranawe i go antap long sait bilong maunten. Plis i bin holimapsim wanpela bilong ol. Tasol man ya i laki long ranawe taim plis i no lukim em.

Plis i painimaut yet long dispela samting. Tasol nau yet i gat bilip olsem ol pipel i mas yusim dispela faktori na mekim gan long sampela taim nau. Na save salim long ol arapela pipel.

WANTOK

All departments. Phone: 325 2500 - Fax: 325 2579
P. O. Box 1982, Boroko, NCD, Papua New Guinea

Publishing Weekly, Thursday, for Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and Group Editor in Chief: Anna Solomon.	Papers distributed by air throughout PNG.
Advertising Manager: Mike Kanin.	Available by air mail subscription within Papua New Guinea and overseas
Editor of Wantok: Leo Wafiwa.	

Advertising deadlines. Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

WANTOK

NIUSPEPA BILONG OL PNG STRET

Noken winim mak bilong amamas, na popaia long lukim Nu Yia

Krismas em i taim bilong ol famili long stap wantaim na amamasim kamap bilong sevua bilong mipela, Jisas Kraisis.

Planti manmeri i holim liklik kaikai na singautim ol pren, famili memba na wanwok i kam bung wantaim. Na kaikai na stap wantaim. Na tu ol i pre na amamasim kamap bilong sevua bilong mipela. Sampela i go tu long lotu.

Dispela em i gutpela tru. Em i gutpela olsem mipela noken lus tingting long mining bilong Krismas. Na go insait long pasin spak na amamas olsem em i wanpela bikpela pablik holiide.

Olsem na wok i stap nau long han bilong wanwan famili long tingim dispela, na skulim pikinini long lotu pasin.

Dispela wik em bai Nu Yia. Planti manmeri bai mekim promis bilong ol. Planti save mekim ol bikpela promis olsem stap long dring bia, kaikai buai, smok na paul nabaut. Sapos ol i holim ol dispela promis o brukim em narapela samting.

Tasol bikpela samting, em i taim bilong sindaun nau na glasim 1997. Na lukim sapos mipela ken senisim long wanem kain we. Na kamapim gutpela sindaun long laip bilong mipela long 1998 na i go.

Tasol amamas bilong ol dispela taim i save winim liklik mak bilong en. Birua i save kamap we ol manmeri i no save lukim neks yia. Olsem na save i stap nau long yupela wanwan manmeri long tingim dispela. Na amamas long gutpela pasin o we i noken bagarapim laip bilong bihain taim.

God blesim yupela wanwan na stap wantaim yupela long dispela taim bilong amamas.

Faivpela ami opisa apil long beil na rausim disisen bilong Sevua

WENCESLAUS MAGUN i raitim

Kaunsel i makim 86971 Meja Walter Enuma bilong Tave, Oro provins, 87929 Kepten Bola Renagi bilong Kemabolo, Sentrel provins, 810051 Kepten Beldon Namah bilong Sombol, Sandaun provins, 86331 Lutenen Michael David bilong Mararamu, Morobe provins na Lutenen Linus Osoba bilong Wihun, Is Sepik provins, Powes Parkop i apil long kot i givim beil long dispela ol ami opisa. Em i askim tu Namba tu Siv Jas, Jastis Mari Kapi insait long Nesenel Kot long Waigani long Disemba 29, 1997 long glasim ken ol disisen bilong Jas Sevua na rausim.

Mista Parkop i mekim Beil Aplikesen aninit long Seksen 11 bilong Bail Ekt long nem bilong dispela faivpela ami opisa. Ol faivpela ami opisa i bin kisim wanpela sas tasol bilong mutini aninit long Seksen 55 (1) bilong Difens Fos Ekt (Sapta No. 74). Long Disemba 15, 1997 bihain long samting olsem tripela mun bilong kot stat long Ogus 1997, Kot i painim olsem ol i brukim sampela lo na i kalabusim ol.

Long Disemba 18, 1997 Kot i kalabusim ol. Kot i kalabusim foapela bilong ol aninit long s.55 (1) bilong Akt, na Meja Enuma Kot i kalabusim em aninit long seksten 55 (2) bilong Ekt taim em i no kisim sas aninit long dispela ekt.

Mista Parkop i tok ol faivpela ami opisa i gat planti gutpela as tingting bilong soim kot olsem disisen bilong Jas Sevua i kamapim planti askim. I gat sampela nupela evidens bilong tokaut long kot na kain pasin bilong pulim kot i go longpela taim tru em i no stret. Long dispela Mista Pakop i askim kot long rausim ol dispela faivpela ami opisa long kalabus bai ol i ken tokim kot sampela moa samting ol i save we i no kamap ples klia insait long namba wan Mutini Kot.

Mista Powes i tokim Jastis Kapi sampela ol as tingting bilong askim kot long givim beil long ol dispela ami opisa em i olsem:

Jas Sevua i no givap long harim Mutini Kot taim kot i harim olsem long tupela taim em i toktok wantaim ol witnes bilong dispela kot. Na dispela i soim olsem em i ken mekim wan sait disisen.

Seksen 53 bilong Difens Fos Ekt i no karamapim asua insait long seksten 55 (2) bilong Difens Fos Ekt. Seksen 55 (2) em i nupela asua na wanpela man i

kisim sas aninit long seksten 55 (1) i no inap kisim asua aninit long 55 (2) olsem long dispela hevi.

I gat inap evidens bilong soim kot olsem Meja Enuma i mekim olgeta samting bilong daunim ol hevi i kamap long Julai 28, 1997. Em i bin singautim wanpela miting bilong ol ami Opisa na askim ol long tok yesa long disisen bilong Praisim Minista.

I gat inap evidens bilong tokim kot wanem as tingting, wanem samting ol i mekim na sapos Brigadier Jenerel Leo Nuia i bihainim lo long kamapim Spesel Operesen Grup (SOG).

Jas Sevua i tokaut olsem eksen bilong ol foapela ami opisa i soim olsem ol i laik rausim Difens Fos Brigadia Jenerel Leo Nuia. Tasol dispela em i no tu bikos ol i no gat dispela kain tingting na tu ol i no rausim Komanda.

Seksen 53 bilong Difens Fos Ekt bilong tok mutini i tok olsem yu inap mekim mutini sapos tupela o moa lain i wok aninit long lo bilong Militeri disiplin i plen long rausim, o stapim man i kisim pawa aninit long lo na sakim dispela lida o i no mekim wok bilong Difens Fos. Mining bilong dispela tok i soim olsem i mas i gat as tingting bilong kain pasin. Dispela i soim olsem ol tripela ami opisa i no mekim plen. Ol i kisim oda i kam long Opisai bosim ol na karim aut wan wan wok bilong ol. Ol i no save long as tingting tru bilong dispela operesen. Olsem na Kot i no inap kalabusim ol long mutini taim kot i no inap painim aut wanem asting bilong ol wan wan.

Jas Sevua i mekim bikpela asua taim em i tok Operesen Rausim Kwik inap bagarapim mama lo na demokrasi bilong kantri. Dispela isu i no stap long kot bilong glasim na olsem Jas Sevua i mekim bikpela asua long mekim kain tok olsem. Wanem samting kot i gat wok bilong glasim em ol hevi i kamap i go inap long Julai 28, 1997.

I gat inap evidens bilong kot i daunim ol sas. Namah, David na Osoba i no plenim dispela operesen. Kot i no glasim ol arapela hevi kain olsem Spesel Operesen Grup (SOG); bin kamap long dispela taim tu.

Kot i mekim bikpela asua long sasim Enuma aninit long sas bilong seksten 55 (2) taim em i bin kisim namba wan sas aninit long seksten 55 (1). Kot i mekim asua tu long i no luksave long wanem samting em i mekim bilong stapim mutini

olsem ol i kot long en.

Seksen 49 (4) bilong Difens Fos Ekt i tok klia olsem Gavman na Dipatmen bilong Difens i mas baim loya bilong ol ami. I kam inap nau Powes Parkop i no kisim wanpela toia. Na putim olgeta kos i kamap samting olsem K100,000. Nau i gat tupela moa loya, Patrick Harricknen na Moses Murray. Dispela bai kosim Gavman na Difens Fos bikpela mani tru long baim ol dispela loya.

I gat sampela nupela evidens i soim olsem sampela lain i lukim Jas Sevua i toktok wantaim Kenel Jack Tuat (narapela bikpela witnes long dispela kot). Dispela evidens i soim olsem i mas i gat nupela kot i glasim ken dispela mutini kot.

I gat moa evidens i soim tu olsem Komanda bilong Difens Fos, Leo Nuia i no kisim dispela wok aninit long lo. Sapos dispela i tru, dispela bai soim stret olsem i no bin gat wanpela bos olsem lo i makim aninit long seksten 55 (1) na 53 bilong Difens Fos Ekt. Na olsem i nogat mutini.

Nupela evidens i soim olsem Difens Fos Komanda i save long dispela plen bilong mutini na i no mekim wanpela samting bilong stapim. Dispela i soim olsem i gat plen bilong mekim sampela samting i no stret o i rong na larim Kepten Renagi, Namah, Lt Michael David na Namba tu Lt Linus Osoba long mekim dispela hevi olsem bai ol i ken sasin ol na rausim ol long Difens Fos.

I gat bikpela asua na pasin i no stret long we bilong harim dispela kot long sait bilong Jas Sevua. Kain olsem i nogat inap wok painim aut aninit long seksten C 18 bilong lo bilong Militeri Disiplin bilong Difens Fos Ekt; i no bin gat wanpela komitet prosiding, Jas Sevua i mekim na kamapim ol evidens; Jas Sevua i no laik givap na larim narapela Jas i harim dispela kot; Na sas ol faivpela ami opisa i kisim i luk olsem ol i karim hevi bilong pasin politik na i no long ol sas tru bilong ol.

Jas Sevua i harim dispela kot bilong long wanpela kot martial. Na dispela i no bihainim wanpela lo long graun na insait tu long Difens Fos Ekt, Sapta No.74.

Praisim Minista Bill Skate i no inap kisim sas bilong mutini bikos em i no wanpela memba bilong ol disiplin fos.

Mista Pakop i tok long olgeta dispela as, ol faivpela ami opisa i akim kot long givim beil long ol dispela ami opisa. Olsem bai ol i ken go het na tokaut long ol evidens i stap nau long kot bai

Kot i ken glasim gut na mekim gutpela disisen.

Em i tok, askim bilong ol ami opisa long beil i go wantaim ol politikel hevi bilong ol praivet ami bilong Sandlain, Operesen Rausim Kwik, Spesel Fos Yunit na Spesen Operesen Grup. Ol dispela hevi i bin kamap long taim ol i bin kisim sas na kalabus bilong ol.

Long bekim tok bilong Mista Parkop, Pablik Prosekuta na Loya bilong gavman Panuel Mogish i long Septemba 18, 1997 ol faivpela ami opisa i mekim wanpela aplikesen bilong Jas Sevua long givap na noken sindaun long harim kot bilong mutini.

Mista Mogish i tok, Jas Sevua i glasim dispela aplikesen na i daunim dispela aplikesen long Septemba 24, 1997. Ol ami opisa i mekim sampela moa aplikesen long taim dispela kot klostu i laik pinis. Tasol Jas Sevua i rausim ol. Ol i karim dispela i go long Suprim Kot na Suprim Kot i rausim aplikesen bilong ol tu.

Em i tok Jas Sevua i odaim kaunsel i makim Difens Fos na ol faivpela ami opisa long givim sabmisen bilong ol. Kaunsel bilong ol faivpela ami opisa i no mekim sabmisen. Nogat. Em i go het na aplai long Jas Sevua i mas givap long harim dispela kot. Jas Sevua i harim ken dispela apikesen na i rausim.

Las tru tupela kaunsel wantaim i mekim sabmisen bilong ol, na bihain long Jas Sevua i glasim olgeta toktok em i painim ol faivpela ami opisa i brukim lo bilong Mutini aninit long seksten 55 (1) na 55 (2) (a) bilong Ekt.

Jas Sevua i harim ken sabmisen long ol penelti na bihain em i mekim disisen bilong em olsem Kepten Bola Renagi bai kisim 10-pela yia, Kepten Belden Namah, Lutenen Michael David, na Lutenen Linus Osoba bai kisim 8-pela yia na Meja Walter Enuma bai kisim faivpela yia.

Mista Mogish i tok, long yusim tok win olsem 'yardstick' long kisim beil long ol dispela faivpela ami opisa em i no stret. Olsem na em i askim Jastis Kapi long noken givim beil long ol dispela faivpela ami opisa na tu long daunim askim bilong Mista Parkop long narapela Kot long harim ken dispela hevi.

Jastis Mari Kapi i tokim ol lain i pulimapim kot haus long Waigani olsem em bai glasim olgeta toktok i kam long Mista Parkop, Mista Harricknen, Mista Murray na Mista Mogish na mekim disisen bilong em long Trinde Disemba 31, 1997 long Waigani Suprim Kot.

WANTOK
NIUSPEPA BILONG OL PNG STRET

P O Box 1982 BOROKO
Telepon namba: 3252500
Feks namba: 3252579

PE BILONG WANPELA YIA 52 NIUSPEPA

PLES	AIR
Mosbi	K30.00
Arapela PNG eria	K60.00
Australia na Nu Silan	K92.00
Esia pasifik na Japan	K123.00
Amerika na Yurop	K180.00



Ol PNG manmeri skelim yia 1997

Yia 1997 i bin lukim planti samting tru insait long 12-pela mun bilong en.

LONG mun Mas, ol soldia bilong PNG Difens Fos i bin kros egens wanpela disisen bilong gavman long kisim ol outsait paitman long stapim hevi long Bogenvil.

Komanda bilong PNGDF, Jerry Singirok i bin go pas long mekim toktok long redio egensim dispela disisen bilong gavman long kisim ol outsait paitman. Bikpela protes i kamap insait long NCD we i lukim ol manmeri i mas i go long palamen.

Long mun Jun long dispela PNG i bin lukim namba-7 nesanel ileksin bilong en na ol lida i makim nupela praim minista em Bill Skate, husat i olupela gavana bilong Nesanel Kapital Distrik.

Gavman i bin lukim planti senis tru insait long sotpela taim bilong en. Ol nupela minista i kamap, senis i kamap bihain na tu ol moa nupela disisen gavman i kamapim na moa moa yet.

PNG i bin bungim taim bilong bikpela san na drai long planti eria insait long kantri.

Hia ripota **JAMES KILA** i askim ol pablik long kisim tingting long wanem samting ol i ting long dispela yia 1997.

Baibel i toktok long en i wok long kamap ples klia.

Em i tok insait long yia 1997 planti traime i wok long kamap namel long ol pipel na tu long gavman na kantri bilong yumi PNG.

Planti ol samting i kamap insait long gavman na tu long ol manmeri.



INANA Kofena bilong Lufa long Isten Hailans provins i gat wankain tingting tu olsem Maggie Tim.

Em i tok olsem 1997 i bin lukim plant samting tru insait long PNG we i go wantaim tok bilong Baibel.

Dispela i min olsem taim bilong bikpela Jisas Kraus i kamap klostu nau na ol manmeri i mas redim ol yet.

Em i tok yia 2000 i klostu nau na planti ol samting we bai traime bilip bilong ol pipel na gavman bilong yumi i wok long kamap ples klia.

PETER Ponde bilong saut-Simbu i tok olsem planti ol eria long PNG i bin bungim bikpela taim bilong san na drai.


Mosbi tu em wanpela ples we san i bin mekim ples i drai olgeta na das stret.

Tasol long Disemba 25, em Krismas De stret Papa God i bin givim blesing bilong em taim ren i pundaun insait long Mosbi siti. Bihain long dispela traime ren i stat go daun yet.

Peter i tok planti ol flaua we i drai i putim kuru bilong ol gen na dispela em i gutpela sain tru.

Em i tok tu olsem dispela olgeta samting i gat bikpela minging tru.


Ol manmeri husat i no tanim bel i mas stat long givim ol yet long papa God.




HILDA Ramsey bilong Kaiva long Oro provins i tok olsem dispela yia 1997 i no bin gutpela yia tumas bikos i bin gat planti trabel tru i wok long kamap.

Em i tok long olgeta de insait long niuspepa, redio na TV i bin gat ripot bilong ol man i kilim narapela man o meri, ol man i bagarapim meri, stilim kar, brukim na na kilim man wantaim gan.

CAROL Leo bilong Kaiva long Oro provins i tok tu olsem em i no amamas tumas long dispela yia 1997 bikos kantri bilong yumi i bungim planti ol



hevi i wok long kamap long sait bilong lo na oda. Planti pipel i bungim traime nogut long han bilong ol raskol, ol man i bagarapim ol meri, bikpela stil-pasin i kamap na ol man i kilim ol yet.




BARI Efota bilong Isten Hailans i tok olsem 1997 em wanpela yia i soim piksa

pinis olsem neks yia 1998 bai narapela yia nogut gen.

Em i tok olsem ol toktok bilong Baibel i stat long karim kaikai nau.

Wanem ol samting i kamap i soim




Wanpela man husat i skelim olsem 1997 em i wanpela gutpela yia em KAVIVI PAPIA bilong Henganofi.

Em i tok olsem 1997 i soim tru ol pipel wanem samting i ken kamap insait long wol.

Em i tok PNG i bin bungim taim bilong bikpela san na ples i drai, tasol nogat planti manmeri i dai.

Steven i tok dispela em i namba wan taim tru long dispela kain hevi i bungim kantri bilong yumi.

Em i tok long ol narapela kantri long wol i save gat planti manmeri i dai, tasol PNG nogat planti manmeri i dai olsem na yumi mas amamas long papa God long dispela.



GRACE Weramino bilong Asaro long Isten Hailans i tok 1997 em i bin wanpela yia nogut tru long bikpela san na ples i drai. Planti ol pipel i bungim hatpela taim stret.

Long ples bilong em, ol liklik pikinini i painim hatpela traime tru.

Ol bikpela manmeri i orait liklik tasol ol liklik mangi i kisim traime stret.

Tasol namel long olgeta dispela samting, planti ol pipel i gat bikpela bilip olsem Papa God i stap wantaim ol na lukautim ol.



MAGGIE Tim bilong Henganofi long Isten Hailans i tok wanem samting em

BIAZ BIABIA LAIK GO SEVE-BRETIM NIU YIA LONG PLES...
HAA... GUTPELA LONG GO LUKIM SWITHOM AGEN!

AIR NIU

BAGAS GO LONG PLES BALUS NA WETIM BALUS...

BALUS BILONG BIABIA IDILEI NA BIABIA KISIM TAIM STRET...
LONG SEIMTAIM PAWA I BLEK-AUT NA PLES I HOT TUMAS INSAIT..

OL I DILEIM BALUS GEN LONG NAMBA TRI TAIM NA BIABIA INO MOA HOLIM KROS BILONG EU...
DILEIM, DILEIM BALUS BAI GO NIUYIA NAU!!
KAMON, BUK MI ZIN WAN HOTEL NAU!!

Ol pipel stil long painim kaikai

IAN KAKARERE i raitim

I GAT tupela ripot nau long Westen provins we ol man i mekim raskol pasin bikos ol i laikim kaikai.

Long Desemba 5, ol pipel bilong ples Kungim i bagarapim wanpela MBA Twin Ota balus bihain long em i pundaun long Kungim ples balus.

Ripot i kam long Katolik sios long Kiunga i tok ol pipel i ting balus ya i karim helpim kaikai na saplai bilong ol i kam. Na taim ol i painimaut olsem dispela balus i no karim helpim kaikai na saplai bilong ol, ol i belhat na stat tro-

moi ston long balus ya. Na bagarapim ol windua bilong balus.

Ripot i tok tu olsem wanpela ples man i yusim rop na jen long pasim wil bilong balus. Na holim pasim dispela balus long moa long tupela aua olgeta.

Ol i no bagarapim tupela pailot bilong balus.

Taim ol i lusim balus ya, tupela pailot flaim i go bek long bes bilong ol long Tabubil. Balus ya i no bin flai long wanpela de taim ol MBA ensinia long Mosbi i wok long stretim ol bagarap.

Long namba tu birua, sampela man i i hensapim sip MV Hiri Chief na ranawe wantaim ol

kaikai na bia em kos bilong ol i klostu long K10,000.

Wokman bilong wanpela bikpela supamakot long Kiunga, i tok stilpasin ya i kamap taim sampela man wantaim spia na bunara kalap i go antap long sip long samting olsem 3 klok moning long Fraide Desemba 5, 1997.

Birua i kamap klostu long ples Kukujoba, we i stap 180 kilomita daunbilo long Flai Riva longwe long Kiunga.

Wantok i no inap toktok wanaim Not Flai plis komanda, Sief Inspekta Saibu Ako, long kisim stretpela ful ripot long dispela stil pasin.

Pomio pipel kisim K295,000 helpim mani long mekim developmen wok

VERONICA HATUTASI i raitim

OL PIPEL bilong Pomio ilektoret insait long Is Nu Briten provins bai kisim nupela bikpela sip bilong helpim trenspotim ol kago na kopra, kakau samting bilong ol i go i kam long long Kokopo na Rabaul.

Dispela bai i kamap aninit long helpim wantaim K295,000 mani we nesenel Palamen memba bilong ol, Alois Koki, i givim long helpim fandim ol projek insait long ilektoret bilong em.

Mista Koki i bin givim 5-pela lip sekmani i go long ol atoriti long Vunadidir gavman hetkwata bilong Is Nu Briten long sampela wik i go pinis. Taim em i presenim sekmani i go long ol bikman i makim ol wok prosek na ol sampela bikman i makim maus bilong ol pipel long Pomio, Mista Koki i tok "ol pipel i gat rait long save olsem mani bilong em i go we. Sapos i nogat pipel bai i nogat gavman na em i rait bilong ol pipel long givim helpim taim ol i nidim."

Dispela mani we memba i givim aut em i hap long Rurel Eksen Progem Fan (RAP) bilong em. Long dispela mani, K100,000 i go long Saut Kos Siping kampani em wanpela sipping kampani bilong ol Pomoi pipel yet long helpim baim wanpela nupela sip bilong ol.

Ol pipel i gat hevi long trenspotim ol kago samting long ples i go long Kokopo na Rabaul na Mista Koki i luksave long dispela na i givim hap mani long kampani bilong baim nupela sip.

Ol pipel bilong Pomio i save yusim sip long i go i kam na ol i gat bikpela nid long en bikos em i wanpela rot tasol long bihainim long wokabout lusim na go long ples bilong ol. Ol i gat foapela arapela bot tasol ol i liklik na i gat bikpela nid long planti man long yusim ol bilong karim ol kago i go na i kam.

Ol arapela prosek we mani memba i givim bai i go long en em:

- Nupela Kalamalage bris long Pomio distrik yet. K100,000 i go long dispela projek.

- K25,000 i go long sanapim wanpela nupela kopra depo long Palmalmal. Ol

pipel long Pomio i bungim hevi long sait bilong trenspot long kisim na salim

ol kago na kopra bilong ol long Rabaul.

- Tupela sekmani i go long Is Nu Briten provinzel edministresen. Wanpela sek we inap long K20,000 i bilong helpim edministresen long Palmalmal bilong putim nupela lektrik mita bokis we bai i moniterim yus bilong pawana

- narapela K50,000 i bilong helpim nupela edministresen hetkota bilong Pomio distrik long Palmalmal long ranim na go hetim ol wok bilong em. Ol wok long sanapim dispela hetkota bai i pinis long disepela ya.

Ol pipel i gat hevi long trenspotim ol kago samting long ples i go long Kokopo na Rabaul na Mista Koki i luksave long dispela na i givim hap mani long kampani bilong baim nupela sip.

Gavana bilong Is Nu Briten, Francis Koimanrea, i bin stap tu long dispela bung long prisenim sekmani i go long ol bikman bilong Pomoi na provinzel edministresen long Vunadidir.

Em bin sapotim fanding helpim we memba bilong Pomio i givim na em i tok ol dispela projek em ol i bikpela samting long helpim na go hetim gut sindaun bilong ol Pomio pipel. Na em i strongim tu ol arapela memba long wok bung wanaim long karim ol sevis i go long ol pipel. Em i tok long dispela pasin na rot tasol ol memba bai i lukim wok bung bilong ol i karim kaikai. Ol i noken mauswara nating tasol ol i mas mekim tru samting long inapim ol promis bilong ol, Mista Koimanrea i tok.

Is Nu Briten provins i no bungim bikpela hevi long bikpela san na ais we i wok long bagarapim planti arapela hap bilong kantri.

Ripot we Wantok i kisim long dispela wik i tokaut olsem ren i bin pundaun long sampela hap bilong provin long Fonde, Fraide na Sarere las wik. Tasol i no long Kokopo eria.

"Mipela i orait long sait bilong kaikai na wara tu mipela i no bagarap tumas," ripot i tok.

Skate kisim ol savelain long rausim nem nogut

Ripota YAKAM KELO i skelim toktok long ol kain senis Praim Minista Bill Skate i bin mekim kamap long las kibung bilong palamen long dispela ya.

PRAIM Minista Bill Skate i wok long strongim gavman bilong em nau taim em i kisim ol strongpela na eksperiens lida bilong wok politik i go insait long gavman bilong em. Em i kisim pinis Sir Mekere Morauta olpela menesing dairekta bilong PNGBC benk na gavana bilong Sentrel benk. Sir Mekere tu em wanpela olpela man bipo husat i bin givim tingting na stia toktok long namba wan Praim Minista Sir Michael Somare long 1975 taim kantri i bin laik kisim independens.

Long gavman tu em Sir Rabbie Namaliu husat i bin Praim Minista bilong kantri long 1992. Na em tu i bin wanpela mausman husat i bin givim tingting long independens bilong kantri. Praim Minista i makim em olsem minista husat bai wok poroman wantaim Praim Minista long lukautim hevi bilong stet.

Insait long gavman nau em Masket langalio, memba bilong Wapenamanda na em i kisim ministri bilong Mineral na Ges. Em i wanpela strongpela na saveman bilong wok politik. Na wantaim em, Roy Yaki memba bilong lalibu. Em i bin Oposisen lida na i bin stap longpela taim long politiks wok.

Dispela foapela lida em wanem kain as na rot ol i go insait long gavman sait em nogat man i save. Tasol ol i bihainim laik na tingting we ol yet i skelim i gutpela long ol i mas mekim.

Dispela muv bilong foapela lain lida ya i mekim bef bilong Bill Skate i stap isi nau. Bikos em i piim olsem em i gat sapot. Sapot we i strongpela na bikpela we i ken ronim gavman bihainim plen bilong em.

Sapos yumi skelim gut, Oposisen sait i bin gat

gutpela sans pinis long fomim gavman taim Bill Skate i bin rausim Pangu Pati na lida bilong PPP Andrew Baing. Na hevi bilong ol vidio kaset Bill Skate i bin stap long en na mekim ol toktok nabaut tu i inap senisim gavman long dispela taim. Tasol wanem as tru na dispela senis i no kamap? Ating planti memba long gavman i no laikim ol olpela lain long ronim kantri. Ating ol nupela na yangpela memba i ting ol olpela lain i bin ronim kantri bipo na i no mekim gutpela senis long dispela kantri. Olsem na nau em taim bilong ol yangpela lida wantaim nupela save na tingting. Olsem na long dispela kain as, Mista Skate i sanap yet olsem Praim Minista.

I gat narapela yangpela man i stap long senisim Bill Skate tu o nogat? Ating lida bilong PDM, lairo Lasaro inap bikos em i yangpela man na em i lida bilong bikpela pati long gavman. Na tu ating Michael Nali inap kamap Praim Minista bikos em i lida bilong PPP long gavman. Sapos yumi lukluk insait nau, Masket langalio em lida bilong nupela pati ol i kolim United Risesos Pati. Na em i wanpela olpela man bilong palamen. Sir Rabbie Namaliu inap kisim bek sia tasol em i nogat pati. Em i memba bilong Pangu husat i stap ausait long gavman nau.

Inap Pater Robert Lak i kamap Praim Minista o nogat? Em i lida bilong Independen grup aninit long nem Meisol. Tasol em i gat sans pinis long kamap namba tu Praim Minista tasol em i no laik bikos em i laik stap gavana bilong Westen Hailans provins.

Ol dispela lida olsem Masket langalio, Sir Mekere Morauta, Sir Rabbie Namaliu na Roy Yaki i lain bilong toktok planti egensim pasin bilong paulim mani na paulim samting insait long sistem bilong politik. Na nau ol i stap long gavman sait. Olsem na ol i mas holim strong dispela pait bilong ol long ol dispela pasin nogut na strongim wok na rot bilong rausim na stapim ol paul pasin long i no ken kamap.

Wewak haus sik gat nupela ambulens

WEWAK Jenerel Haus sik long Is Sepik provins i gat bikpela amamas nau long papa bilong wanpela nupela ambulens.

Dispela nupela ambulens em Wewak Jenerel Haus sik i kisim ki bilong en long las wik Fraide, Disemba 19, 1997 insait wanpela liklik seremoni long Toba Motos long Wewak.

Sampela bikman long praivet na pablik sekta husat i bin stap insait long dispela liklik seremoni long witenesim lonsing bilong nupela ambulens ya em administreta bilong Is Sepik Peter Maginde, Menesa bilong Wespac Benk long Wewak Anrew Munap, olpela primia bilong Is Sepik Jonathan Sengi, Menesa bilong Habas Bod long Wewak Tony Willie, Wwak Distrik Administreta John Kigase na wanpela praivet loya Michael Mosoro. Sief Eksektyute Opisa bilong Wewak Haus sik Dokta Linda Tamsen, Dairekta bilong Fainens na Administresen bilong Wewak Huas sik Callen Thomas na tu ol arapela sinia opisa bilong haus sik i bin stap tu.

Sief Eksektyute Opisa bilong Wewak Jenerel Haus sik, Dokta Tamsen i tok dispela mipela ambulens i kos samting olsem K38,000. Dokta Tamsen i tok K26,000 i kam long sait bilong opisal ka bilong em we em i tredim long Toba Motos na K12,000 em Wewak Haus sik Bod i givim. Na Toba Motos long Wewak i go pas long stretim na redim ol samting long dispela nupela ambulens bikos Wewak Haus sik i baim ambulens long Toba Motos.

Nupela ambulens ya i luk moa olsem wanpela liklik mini bas. Tasol em i gat fowl draiv na tu i gat eakondisen insait long en. Nupela ambulens ya i gat tu ol samting bilong yusim long taim bilong emejensi. Sampela bilong ol dispela samting em Toba Motos i donetim long go wantaim ambulens.

Namba tu siameri bilong Wewak Hausik Bod, Laura Martin i tokaut olsem bod bai wokbung wantaim haus sik long karimaut awenes long askim ol pipel long pablik long amamas long mipela ambulens na tu long lukautim.



• Nupela ambulens bilong Wewak haus sik.

LAITIM ROT BILONG OL ARAPELA

TUDE yumi statim nupela yia. Yumi no save em bai wanem kain yia. Ating em bai yia bilong gohet? Ating em bai yia bilong amamas? Ating em bai yia bilong pen na trabel na wari? Ating em i las yia bilong laip bilong yumi? Yumi no ken save.

Taim yumi sanap long bigin bilong nupela yia, em i olsem yumi sanap long ples balus long Mosbi. Yumi kalap long balus na yumi laik go long Kavieng o Wewak o Kiunga. Tasol yumi no save long rot. Na waris! Pailot bilong balus i save gut long rot. Em inap bringim yu gut long ples.

Statim nupela yia, em i olsem go flai long balus. Long dispela yia bai yumi flai inap long 365 de. Tasol yumi laki: yumi gat wanpela gutpela pailot tru. Em Jisas tasol. Em yet i bin tok olsem: "Mi lait bilong graun. Sapos man i bihainim mi, bai em i no inap wokabaut long tudak." (J 8:12)


Jisas i save gut long dispela rot bilong laip. Em i bin stat olsem liklik bebi; bihain em mangi bihain em i mekim wok kamda inap em i gat 30 krismas; em i mekim wok tisa inap tripela yia. Jisas i save, pen na wari na trabel i wanem samting. Em tu em i bin dai. Em i mekim ol dispela samting na bihain i win. Olsem na yumi mas bihainim lait bilong eksampel bilong em.

Oke. No waris: yumi gat gutpela lida, gutpela pailot bilong nupela yia. *Tasol yumi no mas wokabaut tasol, bihainim lekma bilong em. Nogat. Lida ya i givim wanpela wok long yumi wan wan. Em i tok long Matyu 5:14 olsem:*

"Yupela i lait bilong graun. Yupela mas soim lait bilong yupela; yupela i no ken haitim lait bilong yupela."

Lait bilong helpim ol arapela man-

TU MINIT TINGTI NG



FRANK MIHALIC i raitim

meri nabaut, em i gutpela eksampel bilong yumi. Yumi ol manmeri i save bihainim stail bilong ol narapela. Bilong wanem na yu werim kain kain dres, o Ti siot, o tenis su, o rausis? Bikos yu bin lukim ol arapela i mekim. Olgeta nupela aidia long laip bilong yumi i save kam long ol arapela pipel. Ol i olsem wanpela liklik lait i bin kam insait long laip bilong yumi. Yumi tu i mas tilim dispela kain liklik lait long ol arapela nabaut.

Yu no ken tok, "O maski, lait bilong mi i liklik tumas." Maski em i liklik, em inap kirapim bikipela paia. Wanpela stik masis em inap kukim bikipela haus. Wanpela kandel em inap laitim planti arapela kandel.

Oke, nau yumi laik statim nupela yia. Jisas i sambai long yumi na em i tok save olsem: "Bihainim mi tasol. Mi bai go pas long yu; mi bai lait bilong yu. Tasol yu yet, yu mas wokabaut olsem lait bilong helpim ol arapela nabaut."

Jisas i tok moa olsem: "Mi olsem bikipela kandel bilong Ista. Long Holi Sarere yu bin laitim liklik kandel bilong yu long lait bilong bikipela kandel, na yu bin tilim lait i go. Lait bilong yu i no bin pinis, nogat. Em i soim rot long ol manmeri nabaut long yu. Nau yupela olgeta inap go het."

Harim! Long nupela yia yu mas bihainim lida tasol; na ol arapela manmeri bai bihainim yu. Na yupela olgeta bai win wantaim.

Niu yia 1998 toksave bilong Apostolik Nunsio

REV HANS SCHWEMMER i raitim

Planti taim long taim bilong Adven, Katolik Sios i save yusim ol toktok i stap long Prophet Isaiah. Isaiah i save lukim insait long driman ol samting bilong gutpela sindaun na bel isi long ol pipel. Dispela ol driman na promisi i karim kaikai long taim Maria i karim Jisas. Na long dispela rot God i kam na i stap wantaim ol pipol bilong Em. Bikos long dispela Pikinini, bai i nogat tudak na taim nogut long wanem ol pipol i bin wokabaut long tudak nau i lukim bikipela lait. Ol i no mas karim pen moa. Bai i nogat birua long taim bilong pait. Nogat man bai i dai. Tasol bai i gat lait na amamas, bel isi, gutpela sindaun, na wok bung wantaim.


Krais i kam na gutpela driman bilong Isaiah i kamap ples klia long Em. Tasol bihain long 2000 yia taim ol Kristen i save selebretim Krismas, dispela driman bilong Isaiah i no kamap ples klia na karim kaikai. Yumi lukluk raun long yumi na i luk olsem nogat wanpela samting i senis. Pait namel long gutpela pasin na pasin nogut, lait na tudak i go moa bikipela. I luk olsem pasin nogut long olgeta kain we i wok long karamapim na daunim olgeta ol gutpela pasin.

Long toksave bilong Santu Papa Pop Jon Pol II insait long Wol De bilong Bel Isi, bai kamap long Januari 1, 1998, i tokaut long wanpela pasin nogut inap pasim ol driman bilong Propet Isaiah: Pasin nogut bilong paulim, giamanim, stilim o kisis na givim mani long rot bilong stil. Long tok Inglis ol i kolim corruption. Pop i tok dispela pasin i bagarapim sosel na politikel developmen bilong planti pipol. Em i wanpela sik nogut tru i wok long go bikipela insait long olgeta liklik kona bilong sosaiti. Dispela pasin i mekim fani long lo na i no luksave long ol rul bilong gutpela pasin na pasin i tru.

Em i hat long stapim dispela pasin nogut bikos em i save kam long kainkain pasin. Sapos yu stapim long wanpela eria em bai kirap long arapela eria. Long stapim dispela pasin nogut, yumi mas i sanap strong. Long pinisim dispela pasin nogut, yumi olgeta i mas sanap strong wantaim ol lain i go pas long sios, gavman, ples, famili wantaim gutpela tingting bilong pait strong na pinisim dispela pasin nogut.

Ating yumi mas askim yumi wan wan. Bilong wanem na kain pasin olsem i kamap? Ating Kraisi i no luksave long driman bilong Isaiah? Ating Kraisi i no pinisim wok bilong em na olsem em i lus? Tasol yumi ol Kristen i fel long Jisas taim yumi no kisis em i go insait long laip bilong yumi.

Gospel stori bilong Maria i karim Jisas i tokim yumi olsem Maria na Josep i go long olgeta haus na painim ples bilong slip. Tasol nogat wanpela rum i stap nating we ol inap go insait na slip. Taim yumi harim dispela stori, yumi sori long Maria na Josep. Tasol yumi mas askim yumi yet. Ating yumi i moa gutpela long ol lain i no larim Maria na Josep long go insait long



• Pater Spencer Kombega i givim kominio long ol lotu lain long Krismas long ples Isivini long Oro provins.

haus bilong ol olsem bai Maria i ken karim Jisas long haus bilong ol sipsin na bulmakau?

Oltaim Jisas i paitim dua bilong yumi wan wan long go insait. Em i redi long bringim bikipela laik, amamas, marimari na bel isi bilong em long yumi. Yumi mas tok yesa long Jisas, na larim em i kam insait long yumi.

Jisas i paitim dua long haus bilong ol papa mama husat i mekim bikipela sakrifais long baim ol presen bilong ol pikinini bilong ol, tasol i nogat taim bilong sindaun wantaim ol pikinini. Na ol dispela pikinini i no mekim ol papamama bilong ol i amamas tasol i mekim ol i kraipanti taim na mekim ol i wari.

Jisas i paitim dua long haus bilong ol wokman bilong gavman. Husat i gat wok bilong painim ol gutpela rot bilong helpim ol pipol wantaim sevis gavman inap bringim i go long ol pipol. Na long wok gut long kamapim ples klia ol lo na pasin bilong gutpela na strepela rot insait long publik edministresen. Tasol planti taim ol dispela wokman bilong gavman i save pulimapim poket bilong ol na lus tingting long helpim ol pipol. Pasin bilong paulim publik mani i bagarapim tru ol pipol husat dispela mani i stap bilong helpim ol.

Toksave bilong Pop Jon Pol II insait long dispela Wol De bilong Bel Isi long Januari 1, 1998 em i olsem: Jisas i paitim dua long haus bilong yumi olgeta wan wan manmeri na pikinini. Maski yumi nogat mani, klos, haus, kaikai, maski yumi sik, lapun o karim pen long dispela taim bilong biksan na ais, maski yumi karim pen bikos mani gavman i makim bilong yumi, sampela wokman bilong gavman i paulim long amamasim ol yet. Jisas i paitim dua i stap bilong yumi ken opim dua long haus bilong yumi wan wan na larim Em i go insait.

Olsem na yumi mas opim bel bilong yumi na larim Jisas i kam insait. Yumi noken larim Jisas i

kam na abrusim yumi i go. Ating sapos ol pipol long Betlehem i save long wanem samting ol i lusim taim ol i no larim Josep na Maria i go insait long haus bilong ol, ol inap opim dua long haus bilong ol na kisis ol i go insait. Yumi save wanem samting yumi bai lusim sapos yumi larim Jisas i no kam insait long laip bilong yumi. Yumi save olsem sapos yumi no larim Jisas i kam insait long laip bilong yumi bai yumi no inap kisis laip i stap oltaim. Bikos Jisas em i we, tok tru na laip i stap oltaim.

Jisas em i laip. Na Krismas em i taim bilong amamasim dispela laip. Laip bilong man na laip bilong God. Long dispela as, yumi no inap lus tingting long ol pipol husat i bungim na karim ol hevi aninit long lo na i no aninit long lo. Yumi tingim ol pikinini husat mama bilong ol i save kilim ol insait long bel. Yumi tingim ol pikinini i nogat gutpela kaikai o i nogat skul. Yumi tingim ol brata susa bilong yumi long Bogenvil husat i karim planti pen longpela taim. Yumi tingim ol lain husat i karim pen long bodi na long tingting bikos long pasin tumbuna we i no bihainim pasin Kristen.

Antap long olgeta dispela samting, yumi mas sori long ol lain husat i no bilip long Jisas na i no kisis Jisas long laip bilong ol. Tasol husat i bagarapim wanem samting i bilong Jisas.

Yumi wan wan i mas kisis Jisas long wan wan de long laip bilong yumi long dispela nupela yia. Yumi mas kisis Jisas na noken bagarapim laip bilong yumi long gridi pasin, o pasin bilong luk daun long ol arapela na ting olsem mi tasol i stap. Ol arapela i nogat namba ia mi ken mekim wanem samting mi laik mekim maski long ol arapela.

Mi hop dispela nupela yia bai kamap wanpela gutpela yia bilong yupela olgeta. Larim laip bilong Jisas i pulimapim yupela olgeta long dispela nupela yia. Larim God i blesim yupela.

Wok redi bilong ELCPNG sinot i go het

Evanselikol Luteran Sios bilong Papua Niugini nau i lukluk long sinot 21 bai kamap long Kimbe, insait long Wes Nu Briten Provins, aninit long ELCPNG Niugini Ailan distrik. Ol Luteran Sios memba insait long Niugini Ailan distrik i liklik lain, tasol long bilip bilong redim wok na spirit bilong sanap strong i soim stret olsem sinot 21 bai kamap yet, maski wanem kain hevi i kam.

Bihainim sinot het tok, "Mi makim yu pinis," Jon 15: 16, nogat wanpela samting inap senisim plen bilong dispela bung i laik kamap. Wantaim dispela wok redi, ol Luteran long ailan i sanap na redi gut tru long kaikai bilong dispela wok i mas kamap stret.

Kimbe Provinsel Hai Skul em ples we sinot bai kamap namel long Januari 12-20, 1998. Ol foapela seket bilong Niugini ailan distrik i stap longwe longwe, olsem Kimbe, Bialla, Is Nu Briten na Niu Ailan seket, dispela i kamapim transport, mani na komyunikesen hevi. Tasol wok bung bilong ol lida na sios memba long hap i sanap strong long wok bilong sinot.

Bung bilong ELCPNG Niugini ailan distrik yet i bin makim pinis long wan wan seket i mas putim K10,000 long helpim sinot antap long mani nesenol sios i putim. Long Oktoba 29, mi bung wantaim sinot komiti wantaim siaman bilong komiti, Inspekta Soma Wandong, ekting distrik presiden, Pasto Roewec Roenuc, distrik lida Pasto Furu Tierape (sik) na stap long hevi na arapela memba. Ol i bin soim tingting bilong ol long dispela sinot bai go

het yet olsem sios i bin makim.

"Taim Kundiawa sinot 20 i givim sinot i go long Niugini ailan distrik long Januari 1996, ol i kisis na redi nau long lukautim. Wan wan distrik bilong ELCPNG i mas givim K500 long helpim Kimbe sinot, tasol Ukata na Madang distrik tasol i putim pinis K500. Arapela 13 distrik ol i no putim mani bilong ol yet. Dispela mani em olgeta distrik i mas putim wankain long olgeta sinot i go pinis. Niugini ailan distrik i no bin abrusim wanpela singaut bilong givim helpim long arapela sinot. Em i bin givim mani long olgeta sinot i bin kamap pinis, na nau ol i wet yet long kisis dispela mani sios i makim pinis," sinot komiti i tok.

Ol Luteran yut bilong Kimbe i mekim gutpela wok tru na statim pinis haus bilong sinot long Kimbe Hai Skul graun. Sios bilong tumora i stap long solda bilong ol yangpela na ol Luteran yut bilong Kimbe seket i soim tru dispela piksa bilong sios. Ol i sanapim pinis sevenpela mes haus na wok yet long arapela samting.

Wan wan pastu tu i gat wok long helpim dispela sinot. Ol pastu yet i planim kaikai bilong sinot na tu, lukautim pik na kakarak bilong sinot. Dispela em i gutpela piksa bilong sios lida na wokman i mas go pas na ol Kristen memba i lukim na bihainim.

Taim ol Luteran Sios memba i stap longwe, hevi bilong Rabaul maunten paia i bin rausim planti Luteran memba long Is Nu Briten seket, tasol ol i strong yet. Bogenvil em i narapela seket bilong Niugini ailan distrik, tasol em i gat hevi long nainpela yia nau.

Nogat sain bilong rifom long Is Sepik

WANPELA sinia pablik sevan long dipatmen bilong Is Sepik, Wewak i tokaut olsem nupela rifom sistem i no son na tu wok gut long Is Sepik provins. Em i tokaut tu olsem long nau yet nogat wanpela gutpela na kliapela piksa i kamap long soim olsem rifom sistem i stat pinis long Is Sepik provins.

Na dispela i ken soim ol pipel olsem rifom sistem i kamapim ol gutpela na bikpela senis long stretim ol sistem na rot bilong givim sevis i go aut long ol pipel.

Long Is Sepik provins, olgeta wok na samting i dai na stap. Ol pipel i no lukim yet trupela mining na astingting bilong rifom. Ol pipel i stap yet long tudak na ol i no save long rifom sistem bai kalap long provins long wanem taim, sinia pablik sevan ya long dipatmen bilong Is Sepik i tokim Wantok Niuspepa.

Dispela sinia pablik sevan i

askim Wantok Niuspepa long noken autim nem bilong em. Em i tok long nau yet sampela impoten sevis olsem edukesen na helt insait long provins i bagarap bikos Is Sepik provinsal gavman na provinsal eduminstresen i nogat ol gutpela na stretpela plen na astingting long mekim wok. Arapela bikpela asua tu, sinia pablik sevan ya i tok, em planti opisa i holim ol wok we ol i nogat gutpela save na ekspirisen.

Em i tok long luksave bilong em long nau yet, hetkwata bilong provinsal eduminstresen i no wok gut. Dispela long wanem provinsal eduminstreta i no kamapim ol gutpela na klinpela polisi na gaidlain long wanwan divisen long sanap antap na karim aut wok bilong ol. Em i provinsal eduminstreta i no givim taim bilong em long wanwan hetmanmeri bilong ol divisen o pis long autim wanem kain ol hevi ol i gat

we i kalabusim ol long mekim wok.

"I nogut wokbung i kamap namel long provinsal pablik sevis eduminstresen na opis bilong gavman olsem politikel hetman bilong gavman bilong provins. Tupela atoriti wantaim i slek na provins i no lukim o witnessim sampela senis. Gavana i raun long hapsait na eduminstreta i raun long hapsait," dispela sinia pablik sevan long dipatmen bilong Is Sepik i tokim Wantok Niuspepa.

Em i tok ol arapela provins i wok long lukim sampela senis aninit long rifom tasol Is Sepik i wok long paul yet long kamapim senis. Na ol pipel i wok long kra i na askim gavman yet long gutpela rot, helt sevis, wara saplai, skul na ol arapela sevis. Em i tok kra i bilong ol pipel i soim mak o piksa olsem ol atoriti insait long provins i no mekim wok bilong ol.

Gavman i no hariap long helpim ol sik manmeri long Telefomin

LYNNE MINIRU i raitim

TUPELA minista bilong palamen i askim pinis Sandaun provinsal eduminstresen na Dipatmen bilong Helt long lukluk i go insait long tupela ripot bilong bikpela sik i kamap long Yapsie na Fiak sab-distrik insait long Telefomin distrik.

Provinsal na Lokol Gavman Afes Minista, Simon Kaumi na Helt Minista, Ludger Mond long wanpela stetmen i tok 19 manmeri i bin dai pinis long wanpela narakain sik insait long ol viles bilong Urapmin, Siarimin na Niyol insait long Yapsie sab-distrik.

Stetmen i tok olsem, "i gat bikpela bilip olsem narapela 24-30 manmeri i sik yet. Planti bilong ol dispela manmeri ating i mas dai nau."

Stetmen i tok Katolik Sios long Vanimo i bin ripotim dispela birua kamap long tripela viles insait long Yapsie i go long ol provinsal atoriti long las wik yet.

"Minista bilong Provinsal Afes i no bin kisim toktok stret long dispela sik inap long las wik tasol olsem na em i wari olsem ol provinsal atoriti i kisim dispela infomesen bhain long tupela

wik," stetmen i tok.

Stetmen i tok i gat bilip olsem dispela birua insait long Fiak sab-distrik i kamap long pekpek wara na sik kamap bilong pulim win na i gat ripot olsem 10pela manmeri i dai pinis.

"Baptis Sios Helt Sevises long Telefomin i bin ripotim dispela birua long stat bilong las wik," stetmen i tok.

I gat luksave olsem ol dispela viles i gat birua i olsem tupela o tripela de wokabaut i go long sab-distrik bilong ol wanwan o tupela o tripela de wokabaut i go long Telefomin.

Mista Kaumi na Mista Mond i tok olsem ol bai i no inap guria tumas sapos wanpela bilong ol dispela viles i bagarap, i stap long hap sait bilong PNG/Indonesia boda.

Tupela minista ya i bin wari tru na laik bai wanpela helt tim i mas go hariap tru na painaut long dispela birua.

"Dispela helt tim bai painaut long wanem kain sik i kamap na ripot long mipela na bai mipela ken kisim medikol help hariap i go long ol pipel bilong yumi long ol dispela longwe ples," tupela i tok.

Tupela minista i tokaut moa olsem wanpela provinsal tim

wantaim ol medikol saplai i bin go long Yapsie long las wik Fonde.

Wanpela helikopta bilong Tabubil ol Nesenel Disasta na Imejensi i bin yusim i dropim pinis tupela painaut tim long ol viles we birua i painim ol manmeri. Bihain bai ol i kisim ol gen long pinis bilong wik long ripot long painaut bilong ol.

Stetmen i tok olsem narapela tim bilong Telefomin Baptis Helt Sevises bai wok painaut long birua kamap long Fiak.

Mista Mond i tok save olsem Dipatmen bilong Helt i stretim pinis rot long salim sampela moni bilong tupela medikol tim na i gat ekstra teknikal staf redi sapos ol inidim ol.

Mista Kaumi tok ol Difens Fos bilong Australia i kisim pinis ol AusAID rilip kaikai i go long hap bilong Telefomin we bai i kisim ol inap long tripela de olgeta long pinis.

Stetmen i tok minista i hama-mas tru long ol i bringim kaikai i go long dispela hap bilong kantri.

Stetmen i tok tupela minista wantaim i toktok strong long dispela birua i mas pinis hariap bipo long planti laip i lus na ol i askim ol provinsal atoriti long givim olgeta sapot bilong ol.



• Tupela top gred 8 student, Jelly Ruth Kuman (lephan) na Lucille Injewa i soim setifket na present bilong tupela. ANINIT: Wanpela gred 8 student i dres ap gut tru na small taim em i kisim setifket bilong em. Ol foto: Harry Kombega.



Sandaun pipel askim long ansa bilong wok painimaut long K1 milien pablik mani

.BIKPELA askim i go nau long Minista bilong Konsevesen, Robert Saktas Ali, na Agrikalsa Sedo Minista long Oposisen, Andrew Kumbakor, long wane, samting tupela bai mekim long ol ripot bilong misyusim o paulim mani bilong ol Sandaun pipel. Na tu long ol ripot bilong braiberi i sut i go kam insait long provins em tupela memba ya i gat bikpela save long ol long taim tupela i stap yet olsem ol Sandaun Provinsal Gavman memba.

Ripot i tok ol Sandaun pipel i gat bikpela laik tru long lukim risal bilong wanpela wok painimaut, em ol opisa bilong provinsal na Lokel Levol Gavman Afes i bin karimaut long mun Jun bilong yia1996. ol pipel i bilip olsem ol risal bilong dispela wok painimaut i wok long slip long ol Waigani opis we das i wok long karamapim i stap. Ol ripot ya i as bilong dispela

wok painimaut i karamapim moa long K1 milien pablik mani em i bin paul o i no go long stretpela rot bilong wok.

Sapota bilong PNG Trensperensi, Samuel Tasig, i tokim Wantok long Vanimo olsem dispela paul na misyus pasin wantaim ol narapela pasin hait bilong ol lida bai i go hed moa yet sapos ol nesenel, provinsal na lokel lida insait long Sandaun na kantri olgeta i pilai "pren na wantok sistem" long haitim dispela ol pasin nogut bilong ol lida. Bikos long pinis bilong de, pipel yet bai i karim traipela hevi olsem wanem samting i kamap nau insait long provins.

Mista Tasig i tok stap bilong Mista Sakias na Kumbakor long nesenel kabinet em pipel i amamas na gat bilip long tupela. Na

sapos tupela i laik lukim dispela luksave pipel bai gat long tupela long longpela taim moa yet, orait ol i mas mekim olgeta samting long pawa bilong tupela long longpela taim moa yet. Ol i mas mekim olgeta samting long pawa 2-pela i gat olsem ol Kabinet minista. Wantaim nogat pren sistem na putim olgeta nogut i kamap insait long provins long ples klia.

"Planti tok pait bilong misyus bilong dispela K1 milien i kamap long floa bilong Sandaun Provinsal Gavman. Ol nius lain i kisim ken na putim kamap long redio na niuspepa. Planti pipel i harim na i gat wari long dispela ol ripot, sikelim wantaim ol hevi provins i bungim nau wantaim hevi bilong mani. Pipel i gat rait long save na skelim ol yet wantaim risal bilong dispela ripot," Samuel Tasig i

tokaut.

PNG Trensperensi sapota ya i tokaut tu olsem ol narapela "tokwin" i bin kamap long taim bilong jenerel ileksen olsem sampela lain kendidet i yusim planti tausen kina long braibim pipel long votim ol. Dispela ol tokwin tu i brukim Sandaun pipel bikos ol i no save wanem hap ol bai i sanap. Sapos i gat sampela trupela as o nogat. Ol lida bilong tude i mas mekim sampela samting hariap na kilaim tu ripot bilong ileksen braiberi. Olsem pipel i ken kisim gutpela tingting na stap belisi.

Mista Tasig i tok: "Makim Sandaun pipel mi singautim tupela minista bilong Sandaun insait long Skate-Nali gavman wantaim ol narapela tupela Sandaun memba. Dispela em long bhainim ken dispela ripot bilong ileksen braiberi

na signatim wanpela investigasen i go insait long en. Bikos ol ripot i tok moa long K67,000 wanpela kendidet i bin yusim long braibim ol pipel. Na bikpela samting ripot ya i tokaut long em wanpela bikman pablik sevan wantaim ol narapela i stap aninit long em. Insait long Sandaun provins i bin kisim sampela long dispela braiberi mani na yusim long grisim ol narapela long votim dispela kendidet. Na olsem bilong helpim dispela ol pablik sevan wantaim ol famili bilong ol yet tu."

Stap yet long ripot bilong braiberi insait long Sandaun, wanpela asples ma husat i tokim Wantok olsem em i redi long kamap na givim toktok bilong em long ol otoriti long braiberi i kamap namel long sampela asples man na ol liklik lain pablik sevan, na wanpela bikpela kampani insait long Vanimo.



• Lephon: Ol wantok na wan-wok i kam bung long amamasim Kriskas. Raithan: Lawlah, Ezra na mama bilong ol Barbara i amamas long go long dispela kibung.



AMAMAS LONG KRISKAS




• Ezra (namel) i amamas tru long kisim ka olsem Kriskas presen bilong em.



• Leila (lephan) na Fay (raithan) i tok pilai na Jason long baksait i daunim het na taitim bun long opim dispela botol dring.



• Lawlah na Roberta i no inap weit long kaikai.



• Vicky i amamas tru long kisim traipela presen na les long putim go daun long graun.

• Kelvin (namel baksait) lusim haus kuk na kam gritim Leila, Barbara na Lawlah.



SBDC helpim yu wantaim liklik bisnis

dispela K10,000. Dispela win mani i mas winim mak em yu inap kisim sapos yu investim dispela sem mani long benk o baim sia long en.

Bilong wanem na yu mas mekim win mani long dispela invesmen?

a) Bikos long ronim na lukautim bisnis em i no isi wok. I gat kainkain salens bai yu bungim na bisnis i no inap ron gut. Olsem na bikpela namba wan samting em yu mas mekim win mani antap long invesmen o mani yu putim i go insait long bisnis.

b) Bikos dispela mani em invesmen bilong yu i kamapim em i olsem hap bilong profit mani bilong bisnis, na yu no inap long rausim olgeta profit mani bilong bisnis. Sampela bilong ol dispela profit em yu mas putim i go insait o investim gen long bisnis, bikos ong tupela as:

- Yu laikim bisnis bilong yu long groa na kamap bikpela, profit mani i mas go bek long bisnis.
- Yu mas bekim ol dinau mani em yu kisim long statim bisnis. Na mani bilong bekim dinau i mas kam long bisnis yet.

OL WOK BILONG MANI

Mani bai kam olsem wanem o long

wanem rot

Planti nupela bisnis em ol manmeri i nidim mani long sanapim. Na ol save tingting na glasim gut wanem samting em ol i nidim olsem bilong sanapim haus o opis, faktori, masin bilong wok, ol samting bilong yusim long opis, mani bilong ronim bisnis long olgeta de, na kain samting olsem. Mas i gat tingting tu long mani bai kam olsem wanem long baim ol dispela samting. Tok piksa em olsem hamas mani yu mas dinau, na hamas mani bai kam long yu yet, na hamas mani bai kam long seving bilong famili bilong yu.

Olsem na long statim bisnis, yu mas plenim gut olgeta samting. Tok piksa em, em i no gutpela long baim wanpela trak long ronim trenspot bisnis, taim yu no plenim long putim sampela mani arere long baim pensin, insurens, mentenens kos bilong ka.

Hia em sampela samting em yu mas tingim na plenim o makim mani bilong ol tu taim yu statim bisnis: ol tuls na masin bilong mekim wok, stok o saplai bilong yu, kos bilong ol ka i mekim wok wantaim bilong bisnis long olgeta de, haus, laisens bilong mekim bisnis, insurens, na ol mani em yu yet na bisnis bai yusim long mekim wok long sampela mun inap mani ron gut i kam insait long bisnis.

Yu mas tingim olsem dispela mani i

karamapim ol dispela samting: pe bilong olgeta samting yu nidim bipo yu ken stat salim sevis o prodak long ol kastoma, na sampela mani long helpim yu long tupela o tripela namba wan mun taim bisnis i stat.

Rot bilong kisim mani long statim bisnis

I gat planti rot bilong kisim mani long baim ol samting yu nidim long statim na ronim bisnis. Hia em sampela bilong ol dispela rot:

a) Yu ken yusim seving bilong yu yet o mani yu bin sevim long sampela mun o yia.

b) Mani yu kisim long ol pren o famili mamba bilong yu.

c) Mani bilong ol patna o ol lain i inves long kampani bilong yu.

d) Mani em yu dinau long haus mani o benk.

e) Dinau mani i kam long gavman.

Neks wik:

Mipela bai toktok long ol rot em yu ken kisim o bungim mani long statim nupela bisnis. Na tu bai mipela toktok moa long mani yu kisim taim yu salim sevis o prodak bilong yu. Na wanem samting bai yu mekim long dispela mani, olsem yu laik inves o putim i go insait gen long mekim bisnis i gro na kamap bikpela.

I KAM LONG LAS WIK

SAVE LONG OL INVESMEN LONG BISNIS BILONG YU

Mani bilong yu yet em yu putim i go insait long bisnis em long tok inglis ol save kolim olsem "equity" bilong yu o "capital" o sampela taim ol i save kolim olsem "investment". Sapos yu laikim bisnis long ron gut na gro, yu mas mekim mani o profit antap long invesmen o mani yu putim i go insait long bisnis. Tok piksa em olsem sapos yu putim K10,000 i go insait long nupela bisnis, yu mas mekim moa mani o win mani antap long

OL WANSOLWARA NIUS

Benk ov Hawaii opim akaun long helpim pipel kisim bagarap long 'typhoon Paka'

HONOLULU: Las wik bikpela win ol i kolim 'typhoon Paka' ron i go olsem long Guam, teritori bilong Amerika insait long Saut Pasifik, na pundaunim ol haus, diwai, na bagarapim laip na sindaun bilong planti tausen manmeri na pikinini.

Mekim na Presiden bilong Amerika, Bill Clinton, i luksave nau olsem Guam em i wanpela disasta eria. Na i nidim bikpela helpim long mani, klos laplap, kaikai na ol arapela samting we pipel bai yusim long statim gen laip na sindaun bilong ol.

Nau yet em Benk bilong Hawaii i givim moa long K25,000 i go long Ameriken Red Kros, husat bai yusim dispela mani long helpim ol manmeri na pikinini long Guam.

Benk bilong Hawaii, we i gat opis bilong Honolulu wantaim susa kampani bilong em, First Savings of Guam, i gat tripela benk brens long Guam.

Ripot i tok wanpela opis bilong First Savings long Tamuning (insait long Guam) i kisim bagarap tu long dispela win.

Nau yet em ol kampani, gavman na intanesenel ogenaisesen i givim helpim mani i go long olgeta brens bilong Benk ov Hawaii long Hawaii, we ol i kamapim pinis wanpela spesel sistem-waid akaun bilong kisim komyuniti sapot.

Ol bikman bilong benk i tokaut tu olsem ol i welkamim ol pipel na bisnis long Guam husat i kisim bagarap na lusim planti samting long kisim imejensi dinau mani, we ol i no inap bekim bikpela interes antap long ol.

Samoa Palamen Mamba kot long sas bilong kilim plisman

APIA: Wanpela mamba bilong Samoa long Palamen, Suafoa Lautusi, i bin kamap long Mejistret Kot long sas, bihainim indai bilong wanpela plisman long Novemba 25, 1997.

Plis i sasim Mamba ya long i no draiv gut na kamapim indai long dispela plisman, na i no stap bihain long em i mekim dispela birua, na i no ripotim dispela birua kwik long plis.

Dispela mamba i gat 53 krismas. Na plis i bin holim pasim na sasim em long stat bilong mun Desemba 1997, bikos ol i bilip mamba i bin draiva bilong waitpela ka, em i bin pamim dispela plisman long nait bilong Novemba 25. Birua i bin kamap long ples Malie.

Ripot i givim nem bilong dispela plisman olsem Mathew Seiuli, husat i gat 21 krismas.

Mamba i kamap long kot na tok olsem em i no mekim wanpela rong. Kot bai kaamp gen long Mas 2, 1998.

Suafoa i bin winim Aana Alofi Namba 1 sit long 1996 jenerel ileksen, taim em i resis long tiket bilong Samoa Nesenel Developmen Pati long oposisen. Bihain em i go joinim Human Rights Protection Pati, husat i ronim nau gavman. Bihain ol i haiarim em olsem wanpela konsalten bilong Pablik Woks Dipatmen.

Wok bilong sevim ol taro long Tonga na Samoa long binatang nogut kamap nau


NUKU'ALOFA: Saut Pasifik Komisen (SPC) i statim nau wanpela projek bilong rausim olgeta ol 'beetle' o binatang nogut bilong bagarapim ol taro long Tonga na Samoa. Yuropien Yunien i sapotim dispela projek o wok wantaim mani. Na wok i bilong lukim olsem ol dispela binatang i noken go gen long dispela tupela ailan kantri, na bagarapim taro bilong ol.

Taro em bikpela kaikai bilong ol pipel long dispela tupela kantri. Na tu tupela i save salim long ol ovasis kantri olsem long Yurop, na tu long Japan na Amerika long kisim mani.

Aninit long dispela projek, SPC i skulim ol agrikalisa opisa long luksave long dispela ol binatang sapos ol i go bek o soim pes gen. Insait long projek, ol i kamapim tu ol liklik toksave na piksa pepa wantaim posta we ol pablik i ken luksave. Na save tu long ol binatang nogut ya. Na ripot kwik sapos ol i lukim olsem ol binatang ya i kam bek gen.



• Wanpela helt woka bilong India i givim marasin bilong stapim sik polio long wanpela bebi long Nu Delhi, wanpela bikpela siti long India. Bebi ya em wanpela bilong moa long 122 milien pikinini, husat em krismas bilong ol i aninit long 5-pela yia, em i bin kisim dispela polio marasin long stat bilong mun Desemba, 1997. Wok bilong givim polio marasin long ol pikinini i bihainim nesenel progrem bilong stapim sik polio insait long kantri India long yia 2000. Planti pikinini long Papua Niugini tu i bin kisim polio marasin long dispela taim.



• Helpim wokman sekim tel bilong wanpela Antonov-124 balus bilong karim kago em i bin bungim birua na pundaun antap long sampela haus long Irkutsk taun bilong kantri Siberia. Birua ya i bin kamap long namba wan wik bilong mun Desemba, 1997. Na moa long 60 pipel i bin dai.

LAIPTAIL

Taiwan - ples ol grasruts bilong PNG mas go lukim

FAY DUEGA i raitim

SAPOS yu painim hap long raun long holide taim yu gat moni, Republic of China (long Taiwan) em wanpela hap yu olsem wanpela grasruts man o meri bilong Papua Niugini mas go lukim. Dispela em bikos planti samting ol save mekim i wankain long yumi long Papua Niugini.

Long kantri bilong yumi, ol man-meri save kaikai buai wantaim daka na kambang. Long Taiwan, ol tu save kaikai buai wankain olsem yumi. Mi bin laki long go lukluk raun long Taiwan long mun Octoba inap long wanpela wik olgeta, bihain long tred opis bilong ol insait long Mosbi baim tiket bilong mi na 5-pela narapela niusman bilong PNG.

Mi bin kirap nogut long wanpela taim mipela raun long siti na taim mipela stop long wanpela trefik lait, mipela lukim wanpela man

long motobaik wantaim retpela maus. Mipela askim Sherry, meri husat wok long kisim mipela raun long Taiwan, wanem man ya i kaikai na em tok "buai".

Bihain mipela lukim ol sampela salim buai wantaim daka. Ol save karamapim buai na daka long lip daka. Insait long lip save gat wanpela hap daka, buai na kambang.

Mipela go raun long wanpela ailan ol kolim long Hualien na man ol buai plentesin i no pilai. Planti stret.

Taiwan em wanpela develop kantri olsem na bai yu no inap bilip taim ol tokim yu olsem 40 yia i go pinis, planti bilong ol i rais fama na ol save stap long asples wankain olsem long PNG. Sapos yu go nau, bai yu painim hat tru long painim ol dispela asples.

Bipo tru, ol save kolim Taiwan long Formosa na em save kam aninit long People's Republic of China (PROC). Tasol PROC em i wanpela komunist kantri na



• Oposisen lida nau, Bernard Narakobi sekim rais plantesin.

Formosa i no laikim. Olsem na long 1949, ol i bruk long PROC na senisim nem bilong ol long Formosa i go long Taiwan. Nau yet, PROC save lukim Taiwan olsem wanpela provins bilong kantri bilong ol. Tasol Taiwan save tok ol narapela kantri long PROC. Olsem na bel hevi save stap namel long dispela tupela kantri. Saina ol i save kolim olsem PROC, na Taiwan, ol i save kolim olsem Republic of China (ROC) tasol.

Namel long ol kain hevi Taiwan wok long bungim, em i soim stret wanem gavman i nap mekim long helpim ol pipel bilong em sapos em laikim tru long helpim ol. Mi tok olsem bikos bipo, bipo tru, 75 pesen bilong ol pipel bilong Taiwan i rais fama. Tasol ol fama i no papa

bilong ol graun. I no olsem long Papua Niugini we ol wanwan famili gat graun bilong ol. Long Taiwan, ol lain ol i kolim long landlord i papa bilong ol dispela graun. Olsem na husat fama laik planim kaikai, ol mas baim graun long ol dispela landlord na planim rais na ol wanem narapela samting ol laik planim. Mekim na ol landlord save sasim traipela moni long ol fama. Sampela taim, ol save sasim 20-40 pesen o sampela taim moa, long ol fama. Ol fama save salim kaikai long gaden bilong ol, kisim moni na peim ol landlord. Taim ol i peim rent bilong ol, ol save gat liklik moni tru long baim samting bilong ol wantaim ol famili bilong ol.

Mekim olsem go na gavman luk-

save long hevi bilong ol fama na kam helpim ol. Namba wan samting gavman mekim em long tokim ol landlord long daunim prais bilong graun ol save sasim ol fama.

Bihain long dispela, gavman yet baim ol graun long ol landlord na salim olgeta yet long ol fama. Ol lusim liklik hap tru bilong ol landlord. Bikos ol fama nogat moni, ol no inap baim pinisim ol graun long wan go. Olsem na gavman givim wanwan fama 25-30 yia long baim pinisim ol dispela graun.

Gavman i no peim olgeta landlord long kes (cash) moni. Nogat, em tu sot olsem na hap em peim long kes moni na hap em givim ol landlord sampela sia (shares) insait long ol bikpela bisnis bilong gavman.

Long dispela taim tu bikos long Wol Woa II, woa bin bagarapim Taiwan olsem na ol pipel mas baim olgeta samting long ovasis. Ol olupela landlord nau nogat wok bihain long gavman baim ol graun bilong ol tasol ol gat planti moni na sia insait long ol kampani. Taim ol lukim hevi Taiwan stap long em bikos long woa, ol statim bisnis long baim ol samting long ol ovasis kantri na salim long Taiwan.

Long dispela taim, ol fama gat inap moni long baim ol samting, olsem na ol stat baim ol samting ol olupela landlord i salim, samting ol baim long ovasis na salim gen long Taiwan.

Long dispela pisful len riform, Taiwan kamap wanpela strongpela kantri long wol tude.

PNG em wanpela kantri Taiwan save salim ol saveman bilong em long kam helpim wantaim ol agrikalsa projeks. Dispela ol saveman save kam long wanpela oge-naisesen ol i kolim long Intanesenel - Koperesen na Developmen Fan. Nau yet ol gat tupela projeks long Papua Niugini. Wanpela long Bubia Rises stesin long Lae na narapela long Laloki, ausait long Mosbi.



• Ol ATM wokman na ol kabis em ol i planim.

KANAGE

"Em nau, narapela wik bilong mi ken?"



• Kanage em wanpela haiwe draiva. Wanpela de em lodim ol fiul dram long Lae i go long Pogera. Bipo long em lusim Lae siti long 10 mail, em bungim wanpela meri Minj. Na kisim em na pinisim olgeta gia na kilim na kukim Makam Veli na hailans haiwe.

Taim tupela kamap long Minj, meri tokim Kanage: "Hei poro, yumi kamap long ples bilong mi nau, na yu mas lusim mi." Kanage harim olsem na dispela i no holim em. Bikpela tingting bilong Kanage em long kisim meri ya i go olgeta long Pogera. Olsem na em tanim na putim sampela mauswara nau long meri Minj: "Susa lewa bilong mi, bai mi kaikai lewa bilong yu stret. Yu no laikim tokim mi long Lae yet bai mi surukim na putim gia bilong Minj. Yu leit pinis, em gia bilong Pogera stret mi surukim. Na putim na lokim long Lae. Mi no inap long stap ya".

Yu save, tok pisin em Kanage ya. Olsem na taim em tromoi dispela tok pisin na saitim kona, meri Minj sruk isi tasol i kam na tasim em. Kanage kisim flings na tingim tasol long het bilong em: Em nau, kam klostu yet na tasim automatik gia na bai mipela kamap klostu long Hagen, na stretim sampela sindaun pastaim.

Dacquesie Saa' (Namba 2 wina)

Salamaua

MORobe PROVINS

• Kanage wantaim poro bilong em go painim pis ong wara Makam. Tupela kamap long wara, na rausim laplap na putim long sait. Na as nating na pasim wara. Wara i go daun na tupela stat long painim pis. Kanage tokim poro long putim was long daunbilo. Na em yet go antap long het bilong wara. Na raunim ol pis i kam daun.

Poro opim tupela lek na pasim olgeta rot bilong pinis. Ol pis i kam painim nogat rot na go bek. Na Kanage mekimsave yet long raunim ol pis i kam daun long hap poro i banisim.

Orait wanpela kaluwa pis mekim ejen flait i kam na go pas stret long hul pekpek bilong Kanage. Tel bilong pis ya i wok long flai i go i kam i stap. Poro lukim na save olsem samting i rong pinis. Bikos Kanage em isi tasol go antap long wesana na slip i stap.

Em nau, tupela tingting long we bilong pulim pis ya na rausim long hul pekpek bilong Kanage. Mekim nogat na poro givim wanpela hap diwai long Kanage. Na tokim Kanage long kaikai strong. Taim Kanage mekim olsem poro i tok, poro i holim tel bilong pis na pulim i kam ausait.

Kanage slip long wesana i go na pilim orait. Em kirap na tokim poro olsem: "Dispela stori bilong mitupela i mas stap tasol long hia." Bihaun tupela lap indai long tuepla yet na tekov long ples.

Jalcley Gaung

LAe

• Kanage bilong Makam. Wanpela taim em stori long lewa tambu man bilong em olsem: "Tamfu, asde mi yet, misis na tamfu susa ya go rong gaden. Mipra wok i go afinun na mipra slip rong fus haus. Rong nait nau mi ofim ai ya, man! Mi rukim stret laflaf frong tamfu rus finish. Na mi rukim asangas (Sangana o tos) frong em. Nau mi ting mi fut o mi orl. na seteret, misis tu ofim ai." Em i no pinisim stori yet na tambu i no wanbel long harim dispela stori. Na laik swing long Kanage. Bikos em tupela susa tru bilong em ya.

Kwikitaim, Kanage bikmaus na tok: "No! No! Stof it! You were rucky. I tingim tu fut o orl but ruckily misis ofen her futton eyes so I just rook see with tupra sad eyes frong mi. And I know its a proprematic to you but its a systematic to me."

Foksien Kolan Mosie

BULOLO



• Ol lain long setelmen i bung na soim ol pepa bilong ol long pasin gavman i mekim egens ol long rausim setelmen bilong ol. Tok pisin bilong ol i kraik gut na ol i kisim sampela gutpela ansa long gavman.

Tok pisin - bun bilong ol Sepik

CalLEN MIKE i raitim

TOK pisin tru tumas ya, dispela samting em i bun na bun tru bilong Papua Niugini. Planti yangpela nau long dispela taim i wok long lusim tokples bilong ol isi isi na tu planti i save paul nating long tromoi toktok long tokples bilong papa o mama bilong ol. Sampela i save sem long yusim tokples.

Em nau kainkain senis i wok long kamap na tok pisin i wok long kamap susa na paul long maiss bilong planti yangpela manmeri na ol skul pikinini. Tok pisin i wok long strongim olgeta kain rot na save long kisim ples bilong tokples long stap olsem namba wan tokples bilong ol tumbuna na papamama bilong mipela long taim bipo - taim bilong ol bubu.

Tasol planti arapela provins insait long kantri i no yusim tok pisin wan kain olsem wanpela provins bilong Momase Rijon. Dispela provins insait long Momase Rigon i save yusim gut tru tok pisin.

Dispela provins insait long Momase Rigon em provins bilong namba wan praim minista bilong Papua Niugini Sir Michael Somare - Is Sepik em dispela provins we tok pisin i save pariap gut tru long olgeta

de na nait na aua na minit.

Tru tumas, tok pisin i save pairap na tu i swit moa moa yet long Sepik. Na traim yu wanpela nupela susa o mri yu harim we na pasin na stail bilong tok pisin bilong Sepik, yu bai ting olsem ol Sepik i bosim diksenari bilong tok pisin.

Wanwan manmeri na pikinini long Sepik i gat stail bilong em yet long tromoi tok pisin.

Na taim em i tromoi, blosei, tok pisin i save kamap gut tru. Na bai yumi tok wanem gen. Ol Sepik, tok pisin em ol yu. Taim buai i stap long maus na wanpela rol mutrus o spin i stap long maus, winaka olgeta samting i save sait olgeta. Olsem wanpela yangpela i tok: buai em tok pisin na tok pisin em buai.

Ol yangpela man na meri wantaim long Sepik i pulap tru long kainkain nupela tok pisin. Ol nupela kain tok pisin ol i wok long yusim nau long dispela, taim em ol hapkas tok pisin - hap tok Inglis na hap tok pisin. Yu save, ol samting i wok long senis na ol yangpela long Sepik tu i wok long senis na kamapim kainkain tok pisin. Yu traim askim wanpela yangpela bilong Sepik long tok pisin na em bai traim na yu skelim.

Nogut bai yu tanim na tokim em olsem: Em chal, tok pisin em yu ya.

Ol yangpela bilong Sepik, na ol lapun tu ya, ol i win tru long kamapim ol stail hap tok tok long tok pisin. Na yu tingim wanem, ol dispela stail toktok ol i save kamapim i save kukim tru planti manmeri. Yes ya, ol dispela hap toktok i save go aut tu long ol arapela provins na i save pairap long maus bilong planti manmeri. Na taim ol i sekim long save dispela kain toktok, we i gat stail na mining i kam long wanem hap, ol i save painimaut olsem ol Sepik i wokim, stailim na failim na salim i go aut long ol long promotim na tromoi i go i kam long skelim stail na pasin ol Sepik i ken yusim tok pisin long kamapim.

Long las tripela o 5-pela krismas i go pinis, planti hap toktok i save pairap long ol skul, ples bilong wok, pilaigraun, maket, rot na bas stop. Sampela bilong ol dispela hap toktok em: Yu kisim ya, man maski pasin tasol, kirapim das tasol, olgeta samting maski yu tasol na tu planti arapela hap toktok. Nau nau long dispela taim ol i gat ol nupela hap toktok i wok long pairap moa moa yet. Kain ol hap tok olsem. Lapun na wip yet, lapun na tromoi yet, em

chal, rait olgeta na ol arapela. Yu save wanem, ol Sepik i save tok olsem tok pisin i no save sot o hat long ol. Ol i save tok olsem tok pisin i pulap na i wankain olsem ol i save kaikai buai na spet win.

Yu toktok long ol Sepik husat i kamap na bikpela long asples Sepik, tok pisin em ol ya. Sapos yu wanpela nupela man o meri long arapela provins i kam saun o limlimbur long Wewak na yu laik traim tok pisin wantaim ol Sepik, sori tumas, yu pilim olsem yu inap long stailim ausait yu ken traim. Nogut yu tromoi i go na sotwin long hap rot na ol bai tokim yu. Sori tumas, traim gen.

Sepik ya Sepik hau bai yu save. Ol i gat kainkain we na rot na pasin long sot katim yu na yu bai paul na wara bai wasim yu. Yu ken tromoi tok pisin bilong yu tasol ol bai skelim gut tru na givim bek long yu long stail bilong ol yet we bai daunim pilings na amamas bilong yu insait long wanpela minit tasol. Na taim yu askim long watpo tru na ol Sepik i olsem, ol bai askim yu sapos yu save long mining bilong Sepik. Na taim yu paul i stap ol bai tokim yu. Mining bilong Sepik i olsem stail em pasin i save kamap. Na em chal, em Sepik.

KANAGE

"Em nau, narapela wik bilong mi ken"



• Lapun Kanage save wok long wanpela waitman long Wau, Morobe provins. Na i no save gut long tok inglis. Wantaim de em i kam leit long wok, bikos em go painim buai long maket.

Waitman i lukim olsem Kanage i kamap leit na em askim long tok inglis: "Where have you been?" Na lapun Kanage i bekim: "Sori masta, nogat bin long maket".

**Rudolf W. Bell (Namba 3 wina)
AITAPE**

• Kanage em bikman bilong Papindo Eriku long Lae. Bihain long 4 klok apinun, em baim 6 peks bia na wantu pinisim long rot. Na taim em kamap gut na askim gen. Na Kanage go insait na go sindaun klostu long misis na tokim em isi tasol olsem: "Sapos yu laik go pispis, yu noken pamim hariap. Isi isi na bai yu pilim suwit tru".

Taim misis pinisim kaikai na redim long kaikai, Kanage go ausait long haus, na i go pispis i stap. Yu save, bia save mekim ol man i pispis longpela taim stret ya. Olsem na meri sevim kaikai pinis na wetim Kanage long kam bai olgeta i kaikai wantaim. Tasol kanage i no kam insait kwik. Na em singaut: "Kanage! Yu mekim wanem ya, na mi hangre pinis!"

Kanage pret nau olsem nogut misis i painimaut. Kwik wan em kisim tingting na bekim i go insait: "Se-e-e Mi pilim swit ya". Misis i no harim gut na askim gen. Na Kanage go insait na go sindaun klostu long misis na tokim em isi tasol olsem: "Sapos yu laik go pispis, yu noken pamim hariap. Isi isi na bai yu pilim suwit tru".

Kain tok pisin na kon pasin na Kanage laik long misis i no painimaut long em westim mani long 6 peks bia.

**Gregory Sa's
LAE**

• Lapun Kanage i gat 45 krismas. Em i wok olsem wanpela draiva long Blain Senta (bilong ol aipas manmeri) long Goroka. Wanpela de em i laik spin tasol long Lae na go bek long Goroka. Em draivim ka i go na long Makam rot, lapun Kanage i no tingting long draivim ka. Em i bisi long putim ai long mita boks na kaunim mita olsem: "Pori, siksi, eri, andres eri..." Na i no tingting long wanem sait bilong rot em i draivim ka. Sem taim wanpela waitman draiv long hapsait i kam na klostu tru tupela i pam long bris.

Waitman opim dua kam ausait na krosim nau long lapun Kanage long tok inglis: "Hey you stupid old man! You know which side of the road you suppose to be on!" Kanage tu i no pret long waitman. Na tu i no save gut long tok inglis. Me mekim nating na bikmaus i go bek: "Hey you clever white man, did you know that you driving in Papua New Guinea! Which side of the road i drive is none of your business! Ok!"

Waitman save olsem em bai westim taim long kros wantaim Kanage, na em bikmaus: "You son of a beast!", na go bek kalap long ka na pasim dua. Kanage harim na i no holim em. Em i no save olsem waitman i tok nogut long em. Tasol em givim i go bek long waitman: "Yu tu sanap long bris!"

**Kinde Irapo
LAE**

• Kanage i go raun long Wewak taun na bagarap tru long kaikai buai. Em go long taun maket na baim sampela buai pinis. Na i wok long hamarim i stap. I no longtaim ai bilong em i kisim wanpela meri Yauro i kam. Meri ya i kam klostu na Kanage i askim em: "Susa, bai yu kaikai wantaim buai tu o nogat?"

Meri Yauro harim na kisim narapela kain tingting. Na bikmaus long Kanage: "Lukim yu yet pastaim, yu lapun kela man!"

Kanage harim olsem na bekim: "Yu lukim morata (bilong haus) i sting tasol pos i no sting yet. Em kwila pos ya".

Meri Yauro i harim na bai kisim we, Kanage winim em pinis long toktok.

**Otto Paul
Ambunti
IS SEPIK**

Rut 100-hailans haiwe



• Ol PMV i bung long autim hevi bilong ol. Ol tasol i stap na sevim ol pipel long ron long haiwe.

BUSTIN ANZU i raitim

RUT 100-em ol i save givim long ol PMV bas na draiva husait i save ron long hailans haiwei olsem Kainantu, Goroka, Kundiawa, Hagen, Mendi, Tari na Wabag.

Long nambis en Lae na Madang.

Sapos yu ron stret em bai kisim 7-8 awa, olsem yu kisim bus long 7 kilok long Lae long moning taim em bai yu stap 3 kilok long Hagen. Em planti ol bas draiva husait i save ron olgeta taim i save mekim olsem.

Mi laik givim liklik stori long ron bilong mi long Lae i go antap long asples bilong mi Hagen.

Samting olsem 8 kilok mi bin go kamap long Eriku bas stop. Long dispela taim klostu ol bas bilong hailans husait bin kam slip i go p8inis na mi wet i stap. Ol 15-sita bas bilong i go long Madang, Kainantu na Goroka i pulap i stap. Olsem yet, ol kosta 25-sita bas bai lusim bas stop pastaim na bihain ol 15-sita bai lus. Ol draiva tu i stap tasol em mi save olsem ol buai-daka lain bai pulap na painim ol dispela samting long rot na sisi isi tumas wanpela samting em gutpela em long bai yu baim K10 tasol.

Prais

Hagen na Simbu wankain prais tasol. Mi laik go hariap stret long Hagen na bihain painim PMV bilong mi go long ais blok ples Tambul.

Laki wanpela kosta bas rut 100 i kam na brukim singaut Goroka Simbu, Hagen, Goroka, Simbu, Hagen.. "Mi harim dispela na mi save olsem em sans bas na mi kalap i go insait long baksait sit i no long bikipela dua tasol

long windua. Bikos pasindia dua i pas nogut tru. Krismas tu na planti manmeri les long silip wan nait long Lae gen. I no long taim bas i pulap na draiva i tek-ov. Kosta i go stap long 212 Shell Servis stesin na pulapim fuel.

Abrusim 14 mail i go olsem long Yalu na boskru husait i sanap long dua i kisim mani. Ol i laik go long Goroka peim K10, Simbu K14 na Hagen K18, Mi eskus long boskru na peim K14 long go long Hagen. Yu save em mak bilong Simbu stret. Long 40 mail ol pasindia i go daun na painim sampela drai kokonas watamelon, buai, daka na mango. Bas i wet 15 minit samting na bihain tek-ov.

Radio

Taim mipela i ron long stret-pela rot namel long rumion pigeri, draiva i putim namba wan radio stesin NauFM YumiFM na mi harim nek bilong Justin Killi (JK). Planti ol pasindia i laik silip na taim ol i harim nek bilong JK, ol i kirap. Mi harim stap stret na Azzimbah wantaim Bomaman na i no longtaim gen Robert Oeka wantaim Kuti Mangi. Tupela wantaim i lewa stret bilong mi. Kuti mangi em bikos mi bin go long lukim Mama bilong mi. Mi misim em 12 mun pinis na olsem long yet i tok. Mi misin yu mama.

Mi pilim kalap klap na mi putim ai i go aut na mi lukim olsem ol i laik putim kolta na stretim ol liklik baret we wara i save ron long en. Klostu long kisim Kassin pas stret, long draiva olsem ol pasindia i laik i go autsait na stretim baksait na rausim wara.

Mipela kisim let bas tasol draiva i lukim long 5 gia long Markham veli olsem na i no long taim mipela i stap pinis long get wei bilong hailans

Kainantu. Taim mipela i abrusim Henganofi mi lukim sampela gutpela string bilum ol meri i wokim na putim tasol long sait bilong rot long ol pasindia ron long ka i kam baim man ol gutpela kala bilum stret.

Hap pas 12 em mipela i stap stret long Wes Goroka. Ol pasindia i go daun na baim kaikai ol i baim kain kaikai olsem kumu, krim buns, sois, drai kon, pis plawa, rais na ol soft drink olsem Pepsi, Kola, Sprait na Solo. Mi yet go holim pas long Koka Kola. Taim ol pasindin i kisim sit, bas tek ov. Ron i go long Goroka maket bas stap na sekim ol pasindin tasol i no gat olsem na draiva pinisim olgeta gen bilong en.

Taim mipela kamap long Asaro, ol sampela pasindia i tok em ples bilong nupela Gavana Jenerol Silas Aopare.

Bihain mipela i ron i go antap long Saulo Pas klostu long maunten stret en ol i save pilaim dat, salim kuk kaikai long wanpela hap draiva i stap na ol pasindia i go daun na baim kola, pepsi na man bia dat tu. Sampela i ron i go holim ol kamap ol i kukim na salim. Sem taim tu drink kol wara.

Rot bung namel long Simbu na Goroka i no gut sampela plisman i stap.

Dispela ples i luk olsem bus i laik karamapim. Taim mipela kamap long Kundiawa, planti ol pasindia i go daun. Bus stop bilong i go olsem long Hagen i emti. Traipela ren tu i laik pundaun olsem na ol man meri i go nabaut pinis.

Eksperiens

Taim bas i kamap long Hagen bus stap stret, em 5 kilok. Mi no bilip olsem mi stap pinis long Hagen. 8 kilok long Lae na 5 kilok long Hagen Mi

tok tenkyu long draiva tupela boskru, pikim beg bilong mi na lus lain.

Yes, em wanpela gutpela eksperiens bilong mi. Mi raun gut tru na mi pilim mi orait stret. Planti wok tu i save mekim na i no save raun planti olsem na dispela sans raun mi bin wokim. Sapos yu wok planti na i no gat gutpela silip na malolo, het i pen, baksait i bruk, tingting planti long wok maski smapea taim yu go raun olsem mi just spin tasol.

Raun

Sapos yu tingting long raun olsem lokol turis traim hailans haiwei bilong Papua Niugini. Traim Lae or Madang i go antap long Hailens, or ron i go daun long nambis. Noken tingting long kisim balus o sip olgeta taim.

Em planti mani tumas ron long haiwei na lukim gutpela bus, maunten, wara, kokonas lain bilong Makham o kainkain stail haus bilong hailans.

I gat planti ol stail PMV bas i stap we bai kisim yu hariap tru i go long wanem hap yu laik i go long en. Planti bilong ol dispela bus em bilong ol Hagen. Kain bas olsem Oki B, Steven Keu, Kopi, Wel Kange, T Willie na planti ol narapela kosta na 15 seater bus.

Taim yu ron insait long bas bai yu harim planti ol stori tu. Ol stori bilong politiks, bisnis pilai, pik, mekim m moke, karim lek, kukim nus raun long danis na pati o harim ol gutpela musik i kam long radio bilong kakana bas. Planti ol lain bipo yu no save em bai yu bungim ol na planti ol narapela na mauswara wantaim.

Kain bilong ol draiva sapos ol lokim long enjin bilong rut 100 yu bai kisim filings stret na yu ting yu stap long kaut nain.



Bik Bro

REBO




REBO GO LONG I.C.U* WOD NA PAINIM AUDA LONG HAP...



HALO, DOKTA.. ER,, MI PAINIM PIKININI BILONG MI AUDA. SAPOS EM, KAMHIA-

AUDA.. UMN! WET, MI LUKIM PASTAIM!



OH, YES! OL I KARIM EM IKAM LONG TUPELA AUA IGO PINIS... MI BIN SEKIM EM... SORI TRU, EM BAGARAP TRU!

TASOL, EM ORAITA?



EM I STAP LONG WOD 6.. KAM, YUMI GO LUKIM EM!



AUDA!!



OH MAI, SON! MI ASUA PINIS!

Igo moa Neks Wik!!



SIPAK MAIK



MAIK LANS WANTAIM OL BISNIS-MAN BILONG AUSTRELIA...

YEP! MI LAIK PATNASIP WANTIM YUPELA!

DAT'S GOOD HIDIA!

YEAH, SHOR!



MI LAIK SALIM SAMPELA OL PRODAK BILONG MI WANTAIM YUPELA LONG OVASIS!

WHAT TAIP OF PRODAK?



PEK PEK BILONG KAKARUK!

AI BEG YO PARDON, WHAT?!



YU MIN CHIKEN MENUYA?!

EM NAU! TOP KWALITI!



STRONG NA GUTPELA HAIBRID PEKPEK BILONG KAKARUK!



ER,,SER MAIK,, BUT AI DONT LAIK DA SMEL!

Igo moa Neks Wik!!

KANAGE

"Em nau, narapela wik bilong mi ken"



• Kanage em wokman bilong wanpela hatwea stua long Mosbi. Em lodim kago long foklif na laik putim i go antap long kontena. Tasol ol kago ya das i pulap long ol nogut tru.

Waitman bos wokabaut i kam ausait na lukim das long ol kago. Na em hatim Kanage wansait stret: "Wai na planti das long kago?" Kanage sikirapim het na bekim: "Bos em kago for Kiunga but nogat ren so nogat ron bilong sip so kago slip sore wantaim das".

Kanage bilong Kiunga, olsem na bos i hatim em wansait stret: "Na yu no laik tokim ol susa bilong yu long laip ap long Kiunga riva na pispis na wara Kiunga bai flow?"

Taim Kanage harim dispela, em bel kaskas stret. Tasol em bai mekim wanem, em pasim long tingting tasol na stap.

Maureen Duck
MOSBI

• Ol yangpela bilong ples Kotai go long lukim piksa long Dogur. Ol i go kamap long wara Maranigem na lukim wawen o kandre Kanage i wok long pekpek arere long wara i stap.

Kanage harim nois bilong ol mangi na em supim het tasol i kam ausait na askim ol: "Hei! Yupela laik go we?" Na ol i tok: "Wawen! Mipela laik go lukim piksa bilong Tarzan 323!"

Kanage harim na pekpek kwik na kirap bikmaus gen long ol: Dispela bara Tarzan no inap long mi ya, Wawen Kanage 424!"

Em tok olsem na kwikwan go antap long wanpela diwai i sanap klostu long hap em pekpek. Em laik soim stail olsem Tarzan long swing long rop i go long ol diwai, tasol em popaia na pundaun antap stret long pekpek bilong em.

Ben Semi
WEWAK

• Kanage bilong Simbu. Em i wanpela hapman tru bilong mekim ol fani stori. Olsem na olgeta taim ol mangi long ples save kam askim Kanage long sampela fani stori.

Wanpela taim ol mangi kam bung na Kanage stori long raun bilong em long Lae siti: "Wanpela taim mi go raun long Lae i stap na nogat mani bilong baim PMV i kam bek long ples. Olsem na mi go stilim ka bilong wanpela waitman. Mi isi tasol go insait long ka na tekov. Waitman lukim mi stilim ka bilong em, na em sutim ring long plis (em laik tok ringim plis). Na plis sutim ring bihainim mi i go antap long haive," Kanage tok olsem na ol mangi stat long lap isi isi. "Mi lukluk i go bek mi lukim ring i bihainim mi i kam. Mi lukim olsem mi givim 60 na ring givim 60. Mi givim 80, ring givim 80, mi givim 100, ring givim 100. Mi lukluk beksait gen, mi lukim ring i kam klostu tru long holim mi. Mi kirap tasol mi wantaim ka pendaun na ring sut olgeta i go long Hagen."

Ol mangi harim olsem lap i go indai olgeta.

Anthony Andy
KIMBE

• Kanage i gat wanpela gutpela poroman bilong em. Olsem de dispela poroman save go visitim Kanage. Olgeta de poroman save makim na kamap stret long taim kaikai i redi. Mekim i go na Kanage i les pinis.

Wanpela de poroman redim hotpela ti na stap. Stret Kanage go kamap. Na kisim kap ti na laik dringim. Tasol hot wara i kukim em wansait long maus, na tu insait long bel wantaim.

Kanage kisim taim stret na sindaun isi na wok long kra i stap. Na poro i askim em: "Olsem wanem Kanage?" Kanage sindaun isi tasol na bekim: "Nogat, mi wari long poro bilong mi, em i dai long 16 Septemba 1975. Olsem na mi kra i stap long em".

Poro i save pinis. Na em pasim maus na sindaun isi tru na lap long Kanage i stap.

Ruth Semi
WEWAK

Raun wara i kamap na sevim planti pipel



NEM: Olivia Mangup
KRISMAS: 16 (meri)
ADRES: C/ Forok Village, PO Box 348, Wewak, ESP.
LAIKIM: Harim reggae musik, lukim pilai, pilai volibal, waswas long nambis na go long danis.

NEM: Emma Gabriel
KRISMAS: 18 (meri)
ADRES: C/ Forok Village, PO Box 348, Wewak, ESP.
LAIKIM: Harim reggae musik, lukim piksa, go danis na tok pilai wantaim ol pren.

NEM: Roselyn Maup
KRISMAS: 20 (meri)
ADRES: Catholic Mission Boiken, PO Box 107, Wewak, ESP.
LAIKIM: Go lotu, raun long taun, harim gospel musik, lukim EMTV na waswas long nambis.

NEM: Thomas Pati
KRISMAS: 19 (man)
ADRES: Puri Farm Pty Ltd, PO Box 1372, Mt Hagen, WHP.

LAIKIM: Pilai volibal, stori tumbuna, ritim baibel na go lotu na painim pren bilong mekim plen long gutpela sindaun wantaim long bihain.

NEM: Dennis Hofa
KRISMAS: 17 (man)
ADRES: MTEC, PO Box 887, Wewak, ESP.
LAIKIM: Danis long reggae musik, pilai ragbi tas na volibal.

NEM: Iva Hare
KRISMAS: 24 (man)
ADRES: PO Box 365, Boroko, NCD.
LAIKIM: Go lotu, mekim pren, senisim ol presen na harim ol gospel musik.

NEM: Felix Poipoi
KRISMAS: 22 (man)
ADRES: RH Trading P/L, PO Box 28, Terendau Base, East Kikori, Gulf province.
LAIKIM: Pilai ragbi tas, harim reggae musik, raun wantaim ol pren na piknik long bus.

NEM: Nareki Seno
KRISMAS: 16 (man)
ADRES: Tairora High School, PO Box 60, Kainantu, EHP.
LAIKIM: Pilai ragbi tas, pilai gita, ritim buk na harim gospel musik.

BIPO bipo tru i gat tupela lain klen i stap. Tupela lain ya em Pawa Kobeya na lain bilong Pombo Wareya. Tupela lain ya i save stap na wokim bikipela gaden tru. Tasol long dispela taim, i nogat gutpela wara bilong dring o ol kaikai bilong gaden i ken kisim long groa.

Tupela klen ya i save stap gut na amamas tu. Olgeta taim ol i save amamas long wok bung wantaim long gaden na serim ol kaikai na samting.

Wanpela taim ol i pasim tok long wokim wanpela bikipela gaden. Long dispela gaden bai ol i planim ol kumu tasol.

Olsem na long narapela de, olgeta lain bilong tupela klen ya i sanap lain na stat long katim bus na ol diwai i go. Ol i wokim bikipela gaden tru na planim ol kumu long het bilong gaden i go daun long lek bilong en.

Ol i planim ol kumu pinis na ol i stat long brukim gaden ya i go long tupela hap. Wanpela sait em bilong Pawaw Kobeya klen na narapela sait em bilong Pombo Wareya klen. Ol i mekim olsem pinis na olgeta taim ol i save i go i kam long klinim na lukautim dispela bikipela gaden kumu.

Wanpela taim, olgeta manmeri bilong tupela klen ya i go long klinim dispela gaden.

San i hot nogut tru na ol i mekimsave long klinim

gaden i go i go na i no long-taim, ol i harim wanpela man i toktok. Ol i stop wok na putim ia long harim wanem samting tru i kamap. Ol i go klostu na harim wanpela nek i tok, "hap gaden i bilong yu na hap gaden i bilong mi". Ol i harim dispela nek tasol. Na man tru em nogat man i lukim.



Olgeta i pret nogut tru long dispela na ol i hariap long bungim ol samting na tekov i go bek long ples bilong ol na ol i stat long stori na kamautim olgeta kain kain stori na bilip nabaut long ol pasin bilong kastam na tumbuna na ol kain spirit bilong bus nabaut.

Long morning, ol i salim wanpela strongpela man tasol i go bek bilong lukim sapos wanpela samting i kamap long dispela gaden.

Ol i salim sampela man i go na ol i hait na lukluk i go longwe long traim lukim

sapos sampela samting i kamap. Ol i lukluk gut tru i go na kamap long dispela boda o namel bilong mak we i brukim gaden bilong tupela klen, ol i lukim wanpela raun wara i kamap. Ol i go klostu na lukim olsem bikipela raun wara i wok long kamap na i kamap bikipela nau. Ol i kwik-taim i go bek long ples na stori long olgeta manmeri long dispela samting ol i lukim. Taim olgeta manmeri i go bek lukim, ol i traim long tasim, tasol nogat wanpela samting i kamap long ol. Ol i go insait na pilim gutpela kol tru na ol i traim long testim na i swit gut tru na i kolim gut bodi bilong ol tru.

Dispela nupela samting i mekim ol i amamas nogut tru na ol i pasim tok gen long lukautim gut dispela samting. Na ol i mas serim gen wantaim olgeta lain yet bilong tupela klen wantaim.

Nau dispela raun wara i kamap na i stap na olgeta manmeri bilong tupela klen ya i save yusim wantaim.

Dispela wara i stap nau yet na i kamap bikipela bikos long stori bilong en. Ol i save kolim dispela wara nau em Bune long hap bilong Lepiti long lalibu Sauten Hailans provins.

Em tasol liklik stori tumbuna bilong mi.

Bembo Maka
Is Taraka
Lae, Morobe provins.

Wanem presen ol pikinini bai givim papamama long Krismas?

**FELIX RAMRAM I
raitim**

HUSAT papamama i gat dispela kain kwes-ten i save kamap long Krismas taim olsem nau? Sapos yu nogat, em i orait - tasol yu husat i gat kain tingting olsem yu no rong tu. Bikos sapos yu tingting gut bai yu luksave olsem maski wanem wok helpim yu mekim, wanem samting yu save givim long wanpela na narapela, i no wanblut bilong yu tasol. Pasin gutpela o nogut wantaim belsori yu soim long ol sore lain. Long pinis bilong en, olgeta dispela samting bai kam bek long yu.

Olgeta bikpela de olsem krismas, skul holid, betde na ol spesel de bilong ol pikinini, ol papamama i save pain na givim ol kainkain presen. Na antap long ol dispela "material" pren - wanpela presen planti pikinini na ol yanpela manmeri bilong tede i no luksave yet em 4-pela leta i kamapim ol i kolim "love, Love!" As ol papamama i givim ol kain presen em bikos ol i laikim tumas dispela pikinini o ol pikinini ol i gat. Na askim nau ol pikinini i mas askim ol yet long dispela Krismas na Nu Yia - em wanem presen bai mi givim papamama bilong mi. O dispela gutpela susa, brata, tumbuna, kandere na dispela turangau long sait?

Tupela papamama mi toktok wantaim 2-pela i tok, i tru ol i no save pain presen na givim 4-pela pikinini bilong ol olgeta taim - long krismas tu. Bikos long ol hevi bilong stap long taun na hevi bilong lukautim tu ol papamama na famili bilong papa na mama yet tu. Tasol ol i bilip presen bilong 2-pela i go long pikinini 2-pela i gat em wanem samting ol i gat na givim pinis. Na antap long dispela em lav bilong 2-pela long ol pikinini.

"Tasol ol pikinini i no luksave long dispela na ol i soim bikhet pasin. Sapos papamama i no stap, ol pikinini bai kaikai we, slip we o kisim ol klos we i go wantaim haus bilong slip na stap long en?" Tupela i tok.

"Mitupela i traim olgeta kain rot long mekim ol pikinini i gat dispela na dispela - olsem na mipela tu i mas gat. Tasol mipela papamama i luksave wanem samting i gutpela na wanem samting i nogut. Mitupela i no save dres raskol o groim rasta gras, smuk na kaikai buai o dring spak. Tasol ol pikinini i lukim ol narapela poroman na wan skul i mekim, ol tu i laik bihainim ol pasin na tingting mipela papamama i nogat laik long en. Tasol toktok, belhevi na wari long bel bilong

mitupela i pinis nating. Wanpela samting tasol lav mitupela i gat olsem papamama bilong dispela bikhet pikinini i no lus", tupela papamama ya i tok wantaim sore long nek, ai na bel bilong tupela. -

I gat bilip olsem, wanem samting 2-pela papamama antap i bungim i kamap tu long yu narapela. Na yupela ol pikinini - long olgeta hevi yu kamapim long papa na mama taim lak bilong yu i repela yet. Bikpela tru long mama bikos em i "haus pekpek" bilong yu, haus kaikai, nogat slip na wanem samting moa yu save mama i save mekim long gutpela bilong yu. Inap taim yu sanap na mekim samting long 2-pela lek na han bilong yu. Dispela taim tu papamama i was gut yet long yu, maski tu sapos yu marit - ol papamama i gat dispela strongpela laik namel i stap long ol pikinini.

Wanem presen yu nau bai givim papa na mama bilong yu long dispela krismas - bikhet pasin long dring spak na kisim spak brus? Sakim lo bilong papamama i putim long yu? Kamapim tok pait na stilim samting bilong papamama olsem mani long go na amamasim yu yet? Ol papa na mama i wetim yu long bekim dinau bilong yu long ol. Ol yu wetim ol inap taim ol i dai na bai yu krai na tok sori long ol pasin bilong yu? Nogat? Nau em i taim bilong toksori, na bikpela samting papamama i wetim yu em long bekim dinau yu gat long dispela tupela lapun husait i as tru bilong stap bilong yu.

Mi bungim wanpela gutpela pren bilong mi i no long taim i go pinis.

Plantu taim mitupela i save tromoi tok pilai i go kam, tasol dispela taim mi bungim em - pes bilong em i tokim mi olsem em i gat bikpela wari maski mi givim halow na gut de long em. Em i tanim na soim pes tasol long mi go het long pes 3 na i no bekim gud de bilong mi. Em i mek nais tasol long het makim olsem em i gut de long mi. Klostu 3 o 4 minit i lus nating na mi mi askim em sapos sampela samting i bagarapim bai o tingting bilong em. Asua bilong mi em mi no luksave tumas olsem em i kisim pinis tu sampela strongpela dring. Tasim mi autim askim ya i go long em - mi lukim tupela bikpela raun wara i lus na pun- daun lusim tupela ai bilong en.

"Sori pren, mi no save olsem yu gat wari. I gat sampela samting mi inap mekim long helpim yu? Yu kisim sampela stori i kam long ples o samting?", mi askim pren ya. Longpela taim pinis na em i tok sori long

wanem samting i kamap na em i no tok- tok gut wantaim mi. Em i tokim mi tu olsem em i betde bilong as, olsem na em i amamasim em yet liklik. Tasol dispela amamas i kamapim war ken long em, bikos em i no bekim dinau bilong em hariap na papa bilong em i dai pinis.

Pren bilong mi i tokim mi olsem: "Mi no bin gutpela pikinini bilong papa bilong mi, sampela taim long mama tu. Mi save bikhet na makim tok bilong tupela na 5-pela mun nau papa bilong mi i dai

pinis, tede em betde bilong mi. Dispela liklik bia mi kisim i kamapim olgeta pasin nogut na bikhet mi gat ples klia. Long i no save harim tok bilong papa na mama. Mi save ting olsem mi bikman na mi antap tumas long narapela. Nau mi luksave long dispela lav papa i gat long mi, maski mi soim pasin bikhet na makim tok bilong em.

"Mi sori... em i as long kamap bilong mi na olgeta gutpela lukaut na pasin bilong em - em i karim i go wantaim em pinis. Mi no bekim

dinau mi gat long en... dispela lav em i gat long mi, mi no bekim yet. Mi no gutpela pikinini tumas. Long lapun mama, yes ating mi luksave nau na mi mas mekim em i amamas long sotpela taim bipo long em i ken bihainim papa".

Mi gat sori long pren bilong mi, tasol mi yet i gat amamas long bel bilong mi bilos mi mekim pinis wanem mi inap long mekim. Long bekim dinau mi gat long papa na mama bilong mi 20 krismas i go pinis bihain na tupela i dai.

Inap nau mi tingim yet wanem ol gutpela taim mi gat wantaim papa na mama bilong mi. Sampela taim tu mi save tok watpo ol i mas dai hariap, bikos long gutpela pasin tupela i gat long mipela ol pikinini - bilong wanem tupela i mas dai hariap.

Long taim bilong yumi ol papamama bilong tede, mipela i lainim na skulim ol pikinini long planti kain samting. I no planti yangpela i bihainim "olgeta skul", ol papamama i tok long en. Na planti pikinini tu i kisim lainim long ol

bikhet pasin na narapela moa na longwe long haus bilong papamama. Tasol long ol papamama, ol i mas gat spesel ples insait long lewa na tingting bilong yupela ol pikinini.

Olsem na dispela Krismas, yu husait pikinini i gat dinau long papa na mama bilong yu - tingim bekim dispela lav tupela i gat long yu i go bek. Bikos olgeta seken, han bilong kilok i wokabaut long wanwan de i soim dispela lav papamama i gat long yu.

93FM **YUMI** Redio Stesen bilong yumi yet Harim olgeta gutpela program long 93FM **YUMI**

- * Olgeta lokol sing sing, na ol musik bilong bipo yet
- * PNG Motors prais bilong kes krop
- * Yamaha Provinsel weda ripot
- * BSP liklik bisnismen ripot
- * Pepsi lunch hour rikwest
- * City Pharmacy Lukaut bilong bebi
- * Post (PNG) Ron bilong ol Sip
- * Ela Motors kantri kaundaun
- * American God
- * Sande Gospol so

Em rait redio stesen ikamap
pinis harim long tok ples bilong
yumi yet, 93FM **YUMI**

Salim rekwest i kam long: **YUMI** request

Locked Bag 93
Port Moresby, NCD.
Fax: 320 1995

PNG FM PTY. LTD.
Trading as
NAU FM and YUMI FM
P.O. Box 774,
ort Moresby,
Papua New Guinea
Ph: (675) 320 1996
Fax: (675) 320 1995

Helikopta bai helpim ol plisman

Dia Edita

PASIN raskol i go bikpela long Papua Niugini. Oltaim gavman i painim rot bilong helpim ol plisman long daunim pasin raskol.

Tasol maski nupela save o helpim gavman i givim long ol plisman, ol raskol tu i kamap wantaim moa nupela na klewa trik bilong abrusim ol plisman. I no long taim Gavman i helpim ol plis fos long baim helikopta. Tru tumas, dispela em i wanpela gutpela tingting ol plisman i mekim. Bikos long Mosbi, Lae, Hagen na

sampela bikpela ol siti na taun long Kantri tude, ol plisman i painim hat tru long holim pas ol raskol wantaim ka o bot.

Taim ol raskol i yusim ol rot we ka na bot i no inap long go, ol plisman i no inap holim pas ol. Na olsem planti raskol i save ronowe. Wantaim helikopta, mi bilip ol plisman inap long holim pas ol raskol kwik.

**Herman Kamb
HAGEN**

Noken salim Air Niugini long Sir Buchanan

Dia Edita

Mi ritim long pes wan bilong Post Courier, Mande Disemba 22, 1997 olsem tupela bisnismen Mike Bromley papa bilong Bromley na Manton na Sir Dennis Buchanan papa bilong Flight West i gat tingting long baim Air Niugini.

Long tingting bilong mi, mi no laikim Gavman i salim Air Niugini long Sir Buchanan. Bikos Sir Buchanan em wanpela bilong ol ausait lain husat i kam mekim mani long kantri bilong mipela taim tingting bilong ol pipol bilong mipela i no op yet. Em ronim Talair bisnis na Niugini Nius niuspepa we em i mekim planti mani

long kantri. Bihain em i lusim kantri bilong mipela na i go bek long Ostrelia na i statim Flight West. Wanpela astingting bilong em long pasim ol bisnis bilong em na go bek long Ostrelia em bikos Gavman i no larim em long kisim ol saveman bilong arapela kantri long kam ronim bisnis bilong em. Sori tumas Sir Buchanan. Mipela i no wankain olsem ol tumbuna bilong mipela. Bipo em bipo. Nau em nau. Yu bin laki olsem long taim bilong tumbuna, taim save bilong mipela i no op yet na yu kam mekim mani long kantri bilong mipela. Nau sapos yu laik kam bek, tingting gut. Save yupela i

givim mipela i opim ai bilong mipela long luksave long sampela trik bilong yupela ol ausait lain. Maski husat man i laik sapotim yu, mi ting pasin yu mekim pinis bilong stapim ol bisnis long PNG na kisim olgeta mani i go bek long Ostrelia na kamapim Flight West em i no stret. Olsem na mi sanap strong long askim Gavman long noken salim Air Niugini i go long kain ol man olsem Sir Buchanan. Givim i go long ol man i gat bel tru long PNG na maski ol lain i kam bilong yusim PNG long amamas bilong ol yet.

**Jerry Namaliu
RABAU**

Rausim ol iligel setelmen long Madang

Dia Edita

Mi sapotim tru Gavana bilong Madang, Jim Kas wantaim gutpela disisen gavman bilong em i mekim bilong rausim ol setelmen long Madang taun.

Husat i tok bai ol lain i stap long ol graun bilong gavman i stap taim ol i no kisim tok orait long gavman? Madang taun i no inap stap gutpela olsem planti lain long wol na kantri i save hapim nem bilong en, sapos ol dispela setelmen i stap.

Mi wanpela man husat i save raun i go long Madang planti taim na taim mi lukim ol setelmen long taun i mekim taun i doti, mi save kros tru. Watpo bai ol dispela setelmen i bagarapim gutpela nem bilong Madang.

Narapela samting mi painim aut em olsem ol pipol bilong Madang stret i save mekim gutpela pasin long lukautim taun bilong ol. Tasol ol kam man long Madang i save bagarapim. Planti bilong ol dispela kam man i stap

long ol setelmen.

Olsem na maski daunim tok bilong larim ol setelmen i stap long Madang. Em i no graun bilong tumbuna bilong ol. Salim ol i go bek long ples bilong ol bai ol i ken amamas na tu

Madang gavman i ken mekim gutpela wok developmen long graun. Tenkyu na ful sapot Madang gavman.

**Henry Sapan
KEVIENG**

Mosbi i no sev

Dia Edita

RIPOT bilong sampela lain i paitim meri bilong olupela praim ministra bilong PNG, Stella Chan i kamap long niuspepa na planti bilong mipela i ritim.

Tasol amas meri o man long Mosbi i bungim wankain hevi na ol niuspepa i no raitim. Nius bilong Ledi Chan i kamap long The National niuspepa na Post Courier na EMTV bikos em i meri bilong olupela praim ministra. Mi sori long planti bilong ol liklik manmeri na pikinini bilong PNG husat i bungim kain ol hevi olsem. Sampela i sampela i kisim moa bagarap na sampela i dai tasol nogat planti lain i save.

Mi wanpela man i stap long Mosbi long planti yia na mi pret tru long Mosbi. Laip bilong mi i stap insait long kalabus bilong pret. Oltaim mi mas go kwik long haus, lokim get, haus winda na stap insait bihain long 6 kilok. Sori tru. Mi ting bai mi kam kisim wok long Mosbi na stap fri olsem ples bilong mi tasol nogat. Bihain long planti yia long Mosbi mi ting, ples bilong mi em i moa nais. Mosbi i kamap ples bilong pret. Ol risman i kamap moa ris. Ol pua lain i kamap moa pua. Na ol namel man i kisim birua long ol pua lain na ris lain. Em i no gutpela. Dispela kain pasin i no inap helpim kantri bilong yumi. Mi no save wanem samting bai mi mekim. Mi no ting mi go bek long ples bai helpim mi na ol arapela. Olsem na mi autim dispela warl bilong mi.

Larry Sawok, MOSBI

Joinim haiwe wantaim olgeta provins

Dia Edita

WOK developmen long kantri i no inap go het sapos i nogat gutpela rot i joinim olgeta provins long kantri. Rot em wanpela bikpela sevis tru. Sapos i gat gutpela rot i joinim olgeta wan wan provins long Papua Niugini, mi bilip wok developmen long kantri bai go het kwik tru. Pasin bilong wok bisnis bai kamap strong.

Bai i gat maket bilong karim ol samting i go salim. Ol pipol i ken raun i go i kam long ol provins long mekim bisnis, amamas long lukim ples, kisim save, na kisim ol arapela helpim ol i no inap painim long provins bilong ol yet. Wantaim dispela tingting mi ting gavman i mas mekim rel we o rot bilong ol tren. Yumi mas go het.

Maski lukluk tasol long ol pasin nogat olsem sik AIDS, raskol pasin, na ol arapela samting we inap kamap bikpela sapos kain sevis i kamap na stapim dispela tingting. Long olgeta gutpela wok developmen bai i gat hevi i kamap. Tasol yumi noken surik. Maski ol pasin nogat i laik kamap

yumi wan wan long famili, ples, taun na siti i mas wok hat long stapim. Na larim gavman i go het long kamapim ol gutpela sevis bilong helpim yumi. Taim ol kain sevis i kamap, yumi wan wan i mas amamas long ol dispela sevis na lukautim gut.

Maski bagarapim ol pablik sevis. Tingim taim yumi bagarapim ol dispela sevis, gavman bai yusim dispela mani ol i putim i stap bilong kamapim ol nupela projek long go bek na stretim olupela sevis ol i givim pinis long yumi. Opim ai ol pipol bilong PNG. Yumi mas go het na maski go baksait.

**Kamilus Tamilong
MADANG**

Sekim gut ol ausait lain long PNG

Dia Edita

DIPATMEN bilong Foren Afes na Tred i mas sekim gut ol ausait lain i kam long PNG. Maski ol i kam olsem turis, o wokman o bisnis man, sekim ol gut. Mi tok olsem bikos i gat sampela ol ausait lain i raun long kantri bilong yumi, maritim ol meri bilong yumi na stap long ol ples o taun na ronim ol bisnis aninit long nem bilong meri bilong ol. Mi no mas kolim nem bilong ol.

Tasol mi bilip planti kain ol lain olsem i stap long kantri bilong yumi. Mi save long sampela bilong ol na mi givim nem i go long opis bilong Dipatmen bilong Foren Afes na Tred sampela yia i go pinis, na i kam inap nau nogat wanpela samting i kamap.

Mi no stap long Mosbi bai oltaim mi go i kam long opis bilong Foren Afes Dipatmen. Olsem wanem, ol liklik raskol bilong mipela long PNG i mekim rong, kwik taim ol plisman bai holim pas ol na mekim save long ol. Tasol taim ol ausait lain i mekim bikpela rong tru, nogat man bai kirap kwik na mekim samting.

Dispela em wankain tru long ol politisen. Taim ol i mekim bikpela rong na nem bilong ol i kamap long niuspepa, bihain yumi lukim ol i raun i stap long rot. Em olsem wanem? Olsem na maski sindaun nating long opis. Tingim mipela ol takis manmeri bilong PNG i baim yu olsem na mekim wok bilong mipela gut.

**Daltron Rex
WEWAK**

Papamama mas skulim gut pikinini

Dia Edita

OL papamama i mas skulim gut ol pikinini long mekim gutpela pasin.

Watpo na tude i gat kainkain ol hevi i kamap? Watpo na raskol pasin i go bikpela? Watpo na ol manmeri na pikinini i no sanap strong long bihainim pasin tumbuna, o holim na bihainim pasin Kristen? We stap ol lo na oda pasin long komyniti? Sosaiti bilong yumi tude i bagarap bikos ol yangpela bilong yumi i no moa sanap aninit long ol gutpela skul.

Na asua i stap long husat? Mi ting asua i stap long ol papamama. Yumi ol papamama i gat namba wan wok long lukautim na skulim ol pikinini bilong yumi long mekim gutpela pasin. Taim yumi no mekim dispela, yumi larim ol pikinini long bihainim kainkain pasin.

Na sampela pasin ol i bihainim i no gutpela. Planti taim ol pikinini i save kisim skul nogat long yumi ol papamama. Mi save lukim sampela papamama i tok nogat, pait, pilai laki, pilai pokis, spak o mekim ol arapela pasin nogat long ai bilong ol pikinini bilong ol. Olsem na taim ol pikinini i mekim ol kain pasin olsem na ol papamama i stapim ol, ol pikinini i no save harim skul bilong ol.

Long wanem pasin ol papamama i mekim i no wankain long skul bilong ol. Na bikpela hevi tru i save kamap taim ol dispela pikinini i go joinim ol wanlain bilong ol. Long Tok Inglis ol i kolim dispela "peer pressure". Asua i stap long yumi ol papamama.

**Freddy Mari
WES NIU BRITEN**

Tenkyu faivpela ami opisa

Dia Edita

KANTRI bilong yumi i no bungim bikpela bagarap insait long hevi bilong gavman i kisim ol praivet ami bilong Sandlain long kam long PNG.

Bikos olupela bos bilong ol ami Jerry Singirok wantaim ol memba bilong Spesel Fos Yunit (SFU) i rausim ol i go bek long kantri bilong ol. Bihain long dispela Gavman i rausim Mista Singirok na makim ol nupela Komanda.

Aninit long Komanda Leo Nua, em i kamapim Spesel Operesens Grup (SOG) na ol i traun long holim pas ol memba bilong SFU. Tasol long lukautim laip bilong ol yet na famili

bilong ol ol memba bilong SFU i kamapim operesen Stretim Ples (OSP).

Man husat i go pas long ol em Kepten Renagi husat i kisim sapot bilong Kepten Belden Namah, Lt Michael David, namba tu Lt Linus Osoba na ol arapela memba bilong SFU. Meja Enuma tu i save long OSP tasol em i no stapim olsem na kot i kalabusim ol dispela faivpela ami opisa. Kepten Renagi i kisim 10 yia, Kepten Namah, David na Osoba 8 yia na Meja Enuma 5 yia bilong wokim mutini o putim Komanda Nua na Kepten Carl Malpo long haus ares. I tru ol dispela ami opisa i brukim lo bilong mutini tasol long tingting bilong mi, pasin ol i mekim i stret aninit long konsens (conscience). Olsem na mi laikim yumi olgeta pipol bilong PNG i mas givim bikpela rispek i go long ol dispela ami opisa na tenkim ol long stapim wanpela bikpela bagarap inap long kamap long kantri sapos ol i no mekim wanem samting ol i mekim pinis.

**Lyllian Mona
SANDAUN**

Stretim ol hevi long Laloki Mentel Haus Sik

Dia Edita

GAVMAN mas stretim ol hevi long Laloki Mentel Haus Sik. I nogat arapela haus sik bilong sik long-long long Papua Niugini. Laloki mentel haus sik em wanpela tasol bilong ol haus sik bilong sik long-long.

Olsem na sapos gavman i no glasim ol hevi i stap long Laloki na dispela haus sik i pas olgeta lain i gat sik longlong bai pulap tru long

rot na ples bilong yumi. Na sapos dispela i kamap yu ting bai yumi sindaun isi.

Husat bilong yupela inap go na stapim wanpela longlong taim em i bikhet? Gavman i noken lusim tingting long ol longlong. Ol tu i gat wankain rait olsem yumi ol gutpela manmeri na pikinini. Long dispela as, helt bilong ol i bikpela samting. Gavman i mas painim mani na ol gutpela rot bilong sapotim wok

bilong Laloki mentel haus sik.

Mi harim tu olsem i gat Papua Niugini Mentel Helt Asosiesen. Tasoi mi no harim sapos ol i mekim wanpela wok o nogat? Sapos ol i stap orait inap presiden bilong ol wantaim ol eksekutiv memba i mekim sampela samting bilong helpim ol lain i gat sik longlong.

**Ludwig Kaningre
SIMBU**

Sapotim Bogenvil pilai

Dia Edita

DISPELA em i namba wan taim bilong ol pipol bilong Bogenvil long bung wantaim na pilai bihain long klostu 10-ple yia taim hevi long Bogenvil i kamap.

Pasin ol bikman na ol lain i mekim bilong kamapin dispela bikpela pilai em i wanpela bikpela samting tru. Wanem samting inap bungim ol pipol olsem wanpela pipol i no long sindaun long tebol tasol olsem ol lida bilong Bogenvil Revelusinari Ami (BRA) Bogenvil Interim Gavman (BIG), Gavman na ol arapela kantri long stretim hevi. Nogat.

I gat ol arapela rot tu. Ol Sios i mekim bikpela wok tru bilong strongim bilip bilong ol pipol. Ol Kristen i beten na mekim planti penens bilong bungim ol pipol bilong Bogenvil. Na nau yumi lukim pasin bilong pilai wantaim i

kamap. Kain ol sosel ektiviti i olsem marasin long ol sikman taim ol i sik.

Long pasin bilong wok bung wantaim, toktok wantaim, lotu wantaim, pilai wantaim na kamap wantaim wanpela tingting bai sindaun bilong ol pipol long Bogenvil i kamap gutpela ken. Olsem na pasin ol kodineta na wanem ol kampani i go pas long sponsaim dispela bikpela pilai long Bogenvil em i namba wan tru.

Mi bilip ol lain husat i stap insait long dispela pilai i ken tok olsem ol i amamas tru. Olsem na mi laik bai ol praivet kampani i go het long gutpela pasin ol i mekim piniis long sponsaim moa pilai long Bogenvil.

**Cathline Davamosi
LAE**

Pasin bilong tromoi ai i go i kam long haus lotu i bikpela tumas

Dia Edita,

Mi laik toktok long pasin em sampela manmeri save mekim long olgeta Sande long taim bilong lotu. Taim ol i go long lotu, ol i no save tingting long lotu, ol save lukluk i go i kam long ol man o meri.

Dispela pasin mi laik tok olsem em i pekato pasin stret. Mipela mas go wantaim wanpela main o tingting tasol long lotu. Na maski long man-

galim narapela man o meri insait long haus lotu. Dispela em mi ken tok i sin o pekato pasim.

Mi bilip dispela pasin i bikpela nau long planti haus lotu bilong kantri. Maski ol lotu bilong Katolik, Luteran, Yunaited o ol nupela kain sios nabaut. Pasin bilong man meri tromoi ai i go i kam long haus lotu i bikpela tumas.

Na dispela em wanpela bikpela as bilong

bruk daun long bilip bilong mipela. Mipela save tingting long planti samting tumas. Bikpela em long ol samting bilong graun. Na i no larim main bilong mipela i fri long sampela aua wantaim gutpela tingting bilong bikman.

Mi askim nau wanwan sios long lukluk long dispela hevi, na traim mekim sampela samting.

**Bernard Toi
VANIMO**

'Plis kisim lo i go insait long han bilong ol yet'

Dia Edita,

Mi wanpela mangi bilong Morobe provins. Mi stap nau long Mosbi. Na laik autim komplem bilong mi long wok bilong ol plisman insait long siti. Mi lukim olsem ol i no mekim gutpela wok tumas. Ol plis laik kisim lo i go insait long han bilong ol yet.

Planti taim, mi bai lukim ol manmeri i mekim rong. Na taim plis i kamap, ol bai paitim nating ol manmeri. Ol i no inap long kisim ol i go long plis stesin, askim na sasim o givim skol. Nogat, ol bai paitim nating pastaim, maski ol mangi i givim ol yet long han bilong plis.

Dispela mi laik tok em i no wok bilong plis. Wok bilong plis em long lukautim lo na oda. Na tu bikpela em long mekim ol pipel i luksave olsem plis em pren bilong ol pipel.

Tasol long kain pasin na long Papua Niugini, pipel i lukim plis na bai pret long ol. Dispela mi ting em rong tingting o pasin olgeta. Bikos long asua bilong ol plisman tasol.

Mi ken tok kain pasin bilong ol plis na ol raskol save belhat na mekim raskol pasin i go bikpela. Na plis bai giaman long banisim nabaut rot logn sekim ol raskol. Sore, tumas yupela westim taim na mani ya.

Ol raskol i no longlong bilong yupela

bai ol draiv i go long rot blok. Yupela save westim taim long sekim ol gutpela manmeri ya. Na ol raskol tru save hait i stap. Sapos yupela laik painim raskol, orait senisim pasin na wok bung wantaim pipel. Na pipel bai helpim yupela long kisim raskol i go long han bilong lo.

Mi lukim olsem ol plisman taim ol i putim yunifom, ol bai go antap tru. Planti kamap ainman stret. Sore tumas, sapos yupela raun wanwan wantaim nogat yunifom, yupela save raun olsem ol kingdam save pret ba sruk long bek-sait.

Mi askim nau nupela plis komisina long lukluk long dispela samting. Mipela ol pipel noken pretim plis, mipela mas lukim olsem ol pren bilong mipela olsem ol plisman bilong ovasis. Na i no olsem ol birua bilong pipel.

Sapos plis fos i senisim dispela piksa nogut, em bai pipel i pren na wok bung wantaim plis. Na lo na oda hevi i ken go daun. Sapos nogat, sore tumas, PNG bai stap wankain yet.

Em tasol na mi bai amamas long lukim wanpela bekim i kamap long dispela niuspepa long tingting bilong mi.

**Wesley Wongo
MOSBI**

Sapos yu man tru, noken paitim meri long pablik ples

Dia Edita,

Mi wanpela meri bilong Momase riji, husat i stap nau long Mosbi. Mi laik autim wanpela belkros bilong mi long pasin em mi lukim sampela man save mekim long ol meri. Dispela em long paitim ol long ol pablik ples.

Long dispela holid, wanpela kain pasin i kamap stret long ai bilong mi long rot ausait long Ston N Shop supamakot long Waigani. Long apinun tru, wanpela meri hailans i pinis long wok long stua ya na kam ausait. Na man o prenman bilong em, husat i bilong Tolai, i paitim em nogut tru long bas stap i stap.

Planti manmeri mipela i sanap na lukim. Sem taim wanpela waitman ron i kam na lukim. Orait em stap na tokim man long

noken paitim meri. Na kisim meri i go long haus na tupela i stretim. Tasol man Tolai ya i paitim yet dispela meri. Waitman i givap na tekov.

Mi laik tokim dispela man sapos em i ritim dispela leta olsem em i wanpela pipia man stret. Bikos sapos em i man tru, em i no inap paitim meri o prenmeri bilong em long pablik ples, olsem dispela hap tok long inglis: "Real man don't abuse women".

Dispela kain pasin bilong ol kain man long paitim meri long pablik ples i no stret. Yupela ol meri mas sanap strong na kotim man o prenman bilong yupela. Na lo bai mekimsave long ol.

Bipo ol man i ken mekim olsem, tasol nau i gat lo i stap long lukautim ol meri.

Planti pipel no save long mining bilong Krismas

Dia Edita,

Nau em i taim bilong Krismas, na dispela wik i go em bai Nu Yia. Mi laik tok olsem mipela long Papua Niugini, mi lukim planti manmeri i no save long mining bilong Krismas. Bikos ol i save amamas olsem em i wanpela bikpela holid nating. Na i no tingim wanem as tru bilong Krismas De.

Krismas em i taim bilong mipela long tingim papa God i marimari long tekewe ol pekato bilong mipela. Na em i salim holi spirit i kam na givim bel long mama Maria long karim bebi Jisas. Husat i dai long sevim mipela ol brata susa bilong em.

Olsem na mipela ol manmeri bilong dispela graun i mas tingim dispela, na holim liklik prea bipo long mipela i kaikai ol pati kaikai.

Tasol tude mi lukim ol man save tingting long spak na mekim bikhet pasin long taim bilong Krismas. Na lus tingting olgeta long go long lotu. Mi save lukim dispela na sem nogut tru.

Plis mipela mas traim na spenim wanpela minit o seken na tingim Jisas Kraus, husat i kisim pen bikos long mipela tasol.

Mi laik skruim toktok moa long amamas bilong Nu Yia. Mi save harim na lukim long olgeta Nu Yia,

i gat bikpela birua i kamap olsem ka i pam, PMV i kapsait long haiwe na manmeri i dai.

Mi laik askim nau ol manmeri long tingim dispela, na lukautim ol yet long dispela taim. Nogut mipela amamas i go winim limit o mak na i no inap long lukim neks yia.

Em tasol na mi askim papa God long salim blesing bilong em long yupela olgeta ol manmeri na pikinini bilong dispela graun long dispela gutpela taim bilong amamas. Lod i stap wantaim yupela.

**Ian Karesia
MOSBI**

Maski paitim meri long pablik ples

Dia Edita,

Mi wanpela meri bilong Is Sepik provins. Mi stap nau long Kimbe long Wes Nu Briten provins. Mi laik autim belhevi bilong mi long pasin em mi lukim sampela man save mekim long ol meri, dispela em long paitim ol long ol pablik ples olsem ausait long stua, maket ples, arere long bikpela rot o long pilai graun.

Mi laik tokim ol dispela kain man olsem yupela i no save lukim pes bilong meri ya. Olsem na yupela save pret olsem nogut meri bai lusim yupela olgeta. Na save bihainim tumas meri na paitim ol long ol pablik ples.

Traim na tingim sapos susa bilong yupela, ol man i paitim

olsem. Bai yupela sore o nogat?

Mi save lukim sampela man i yusim olgeta strong olsem ol i paitim man, na paitim meri bilong ol. Meri bai pilim pen na singaut tasol man i no inap long tingim dispela. Man bai paitim yet meri na kikim em long sait.

Yupela ol kain pipia man i mas save olsem sapos ol meri i ritim yupela long plis, yupela bai kisim taim stret ya. Bikos nau i gat lo i stap long lukautim ol meri. Olsem sapos yu paitim meri, plis i ken sasim yu long kriminel sas.

Mi laik skruim moa toktok olsem em i gutpela long man kisim meri i go long haus, na tupela toktok gut na stretim. Sapos man laik paitim meri, em i noa gutpela long haus

na i no long pablik ples. Tasol mi no mining olsem ol man i ken paitim tu meri.

Ating waitman i kam long taim pinis we mipela mas ek olsem man, na lukautim ol meri o prenmeri bilong mipela long gutpela we. Na i no long wanpela i bosim narapela.

Em tasol toktok bilong mi. Yu husat man o meri i ritim dispela pas na laik bekim, plis rait tasol long Wantok niuspepa. Na mi bai amamas tasol long ritim.

God blesim yupela olgeta.

**Mary Lou
KIMBE**

Asua bilong Air Niugini em long aipas bilong menesmen

Dia Edita,

Mi laik autim tingting bilong mi long wanpela ripot em i bin kam aut long sampela taim i go pinis olsem Air Niugini na ol arapela liklik balus kampani laik apim pe bilong tiket. Bikos sapos ol i no apim pe bilong tiket, bisnis bai bruk daun.

Mi laik bekim olsem dispela em i wanpela bikpela bulsit tru. Mi no bilipim tru ol dispela toktok em mi ken tok em bulsit tasol.

Long bipo yet i kam inap nau, Air Niugini inap long stretim menesmen bilong em. I gat planti moa wokman meri winim mak em inap long kisim. Na tu i gat kankain wokman meri husat i wok bikos long wantok sistem, we ol i no save gut long mekim wok. Ol wokman meri bilong Air Niugini i kisim bikpela diskaun tumas long flai i go i kam long provins bilong ol, na tu long ol ovasis kantri.

Dispela em sampela bilong planti asua i stap wantaim nesenel balus kampani bilong mipela, Air Niugini. Tasol ol menesmen bilong bipo i no stretim i kam inap nau.

Narapela samting tu em long ol F28 balus em Air Niugini i yusim nau. Mi save olsem i nogat moa maket bilong ol dispela kain balus long wol. Em mipela long PNG wantaim ol kantri long Afrika i ronim yet. Tasol dispela em ol seken hen balus nau ya. Bikos kampani i wokim ol kain balus i no moa wokim. Olsem na long spea pat, em bai kos moa mani tru.

Dispela i wankain olsem ol Subaru ka long PNG, we i nogat moa spea pat bilong ol.

Menesmen bilong Air Niugini i save long dispela bipo yet. Na ol inap long putim askim i go long nesenel gavman long stretim tasol olgeta ples balus

long provins em F28 save pundaun. Na baim ol nupela kain balus.

Olgeta dispela samting i kosim Air Niugini moa mani long ronim. Long bisnis, kos em bikpela samting. Sapos yu no daunim kos bilong ronim bisnis, sore tumas, bisnis inap inap long mekim mani na profit. Dispela em i asua bilong Air Niugini nau.

Mi bilip nupela menesmen mas mekim bikpela senis tru long Air Niugini. Na maski long givim bulsit bilong apim prais bilong tiket. Yupela apim long bipo yet i kam na bai go inap long we? Mipela ol pipel bilong kantri i kisim taim pinis. Na i no laik lukim Air Niugini i apim moa prais bilong tiket.

Em tasol.

Leo Mathews, WEWAK

Nau em sans bilong malolo wantaim famili

Dia Edita,

Nau em i taim bilong Krismas na Nu Yia holid. Mi lukim planti famili i sindaun bung wantaim long ol ples, taun, siti na setelmen, long ol dispela taim long bipo i kam inap nau.

Ol i save kukim kaikai na sindaun kaikai wantaim. Bipo long ol i kaikai, ol bai serim prea na tingim Jisas Kraus, husat em mama Maria i karim na bihain i dai long tekewe sin pasin bilong mipela ol brata susa bilong em.

Mi lukim olsem dispela em i nais tru. Planti papamama long ol taun na siti i nogat taim long wanpela ful yia long sindaun gut wantaim famili long haus. Na pilai o mekim ol pikinini i amamas. Olsem na dispela em i wanpela gutpela taim stret.

Bikpela tru em long ol papa. Ol i save go wok na tingim wok oltaim. Bihain long wok, ol bai go holim liklik dring wantaim ol pren o wok lain o kastoma bilong ol. NaNa bai go kamap long haus long nait, kaikai na slip. Moning bai kirap na go bek long wok. Long wiken tu, em wankain tasol.

Olsem na nau em i gutpela taim stret. Plis ol dispela kain papa, em wanpela taim tasol bilong yia, olsem na tingim na stap amamas wantaim meri pikinini bilong yupela long haus.

Mi askim nau Jisas Kraus, sevia bilong mipela long salim blesing bilong em i kam long mipela wanwan, na bai mipela i stap gut na amamas ong dispela taim. Na wetim kam bek bilong Bikpela, i redima bilong mipela.

**Cecilia Guna
MOSBI**



OTML is a majority owned subsidiary of BHP

Scholarship Program For National Employees

Application Form

File No:

OK TEDI MINING LIMITED wishes to advise its employees, who wish to apply for a dependent Scholarship Program for (1998) school year. This applies to dependent children attending High Schools, Tertiary Institutions and International Primary Schools.

Those employees who are presently on Dry Weather Supplementary Allowance, and have not yet completed a scholarship application form, should immediately complete the coupon below and send it back together with documentary proofs of enrolments and academic results for this year (1997) to OTML either by mail or facsimile.

The completed Application forms should be sent to the **Training Administrator, Ok Tedi Mining Limited, Training Department, P.O. Box 1, Tabulbil, WP, Fax No: 548 9502. (Applications will close on the 30th December, 1997).**

Employee Details

Name:OTML Department:

Employee No:Award Grade:Staff SN1-6 Grade.....

Housing Type: 'B' 'C' P/Camp Other
Specify:

Dependent children for whom a scholarship is requested

1. Full Name (Please Print) Sex Male/Female Age	Institution/School: Adress: Tuition Fees: K..... Last Grade: Year:..... Next Grade: Year:.....	3. Full Name (Please Print) Sex Male/Female Age	Institution/School: Adress: Tuition Fees: K..... Last Grade: Year:..... Next Grade: Year:.....
2. Full Name (Please Print) Sex Male/Female Age	Institution/School: Adress: Tuition Fees: K..... Last Grade: Year:..... Next Grade: Year:.....	4. Full Name (Please Print) Sex Male/Female Age	Institution/School: Adress: Tuition Fees: K..... Last Grade: Year:..... Next Grade: Year:.....

OTML Caring for your children's future

Should any concerned employees have any queries, contact us on the following telephone numbers for more information:

5483380, 5483305, 5483139, 5483190

Winim Prais Winim Prais Winim Prais Winim Prais Winim Prais Winim Prais

WANTOK ASKIM

Bekim Askim bilong Wantok nau na winim ol dispela prais

Namba wan prais

- Wanpela balus tiket i kam long Mosbi na slip tupela nait long Islander Hotel.
- Olgeta bekim bai gat sans long stap insait long dro bilong winim dispela prais.

Namba tu prais

- K500 prais mani
- Namba wan 500 bekim bai gat sans long winim dispela prais.

Namba tri prais

- 5 Katen Besta tinpis
- Narapela 200 bekim bai gat sans long winim dispela prais.

Namba foa prais

- 10 -pela T Shirt bilong Wantok
- Las 100 bekim bai gat sans long winim ol dispela T Shirt bilong Wantok.

Bekim ol dispela askim bilong Wantok Niuspepa hariap na bai yu gat sans long winim ol dispela prais!

KATIM LONG HIA

Ol askim bilong Wantok Niuspepa

- Hamas yia nau yu save baim na ritim Wantok?
One yia 3 yia moa long 5 yia
- Em i isi o hatwok long painim na baim Wantok?
Isi bikos:.....
Hatwok bikos:.....
- Yu ting wanem long pe bilong Wantok?
Dia tumas:.....
I orait:.....
- Yu save baim Wantok long stua o long strit o maket?
Stua.....Maket.....
Strit.....
- Yu save baim Wantok long wanem de?
Fonde.....Fraide.....Sarere.....
Sande..... Mande.....
- Taim yu baim Wantok, yu save ritim wanem stori pastaim?
Bekim:.....
- Yu amamas long ritim wanem ol stori long Wantok?
Makim faipela tasol.

Nius	Plis Ripot
Bogenvil Nius	Biabia
Tu Minit tingting	Provins Nius
Sios Nius	Wol Nius
Wansolwara Nius	Wol Nius
Laipstail	Kanage
Musik stori	Top 20
Penpren	Stori tumbuna
Ol Pas	Laipplain
Tambu Toro	Rebo
Sipak Maik	Spot Poto
Spot Dro	Spot Nius

- Putim nem bilong tupela stori yu save les long ritim.
a).....
b).....
- Yu laik lukim wanem kain ol resis long Wantok?
Wantok Bingo yes nogat
Painim Bal yes nogat

- | | | |
|---------------|-----|-------|
| Kanage/Mutrus | yes | nogat |
|---------------|-----|-------|
- Ol narapela resis:.....
- Taim yu ritim Wantok pinis, hamas moa manmeri i save ritim?
Namba:.....
 - Yu save laikim ol Wantok Spesel Saplimen tu o nogat?
Bekim:.....
 - Yu laik lukim wanem kain ol advetaismen o toksave long Wantok?
Ol kaikai, sop, marasin:
Ol nupela ka, bot ol masin:
Ol sekenhan ka, klos, masin:
Ol spesel long ol supamaket:
Ol spesel bilong ol bakstua:
Ol nupela prodak:
Painim wok:
Toksave bilong gavman:
 - Yu bin baim sampela samting long ol advetaismen yu lukim long Wantok?
Yes..... Nogat.....
Yu baim wanemsamting:.....
 - Yu laik lukim wanem ol arapela nupela samting long Wantok?
Bekim:
 - Yu laik lukim moa poto o stori o advetaismen long Wantok?
Moa poto.....moa stori.....
moa advetaismen.....
 - Yu laik mipela i printim Wantok hamas de long wik?
Olgeta de..... Tupela de
 - Wanpela de tasol.....
 - Yu ting wanem long Tok Pisin bilong Wantok?
I orait.....
I karangki liklik.....
 - Yu save kisim nius olsem wanem?
Long Wantok:.....
Long ol Inglis niuspepa:.....
Long redio:.....
Long televisen:.....

- Yu save baim ol dispela niuspepa tu o nogat?
The Independent.....
Post Courier.....
National.....
Eastern Star.....
Ol ovasis pepa.....
- Hamas de yu save baim ol dispela niuspepa?
Olgeta de..... wanwan de.....
- Yu gat redio o nogat?
YesNogat.....
- Yu save harim wanem redio stesin?
Provinsal redio stesin
Karai
Kalang
Nau FM
YumiFm
- Yu gat TV o nogat?
Yes..... Nogat.....
- TV bilong yu inap long kisim wanem ol stesin?
Nem bilong ol stesin:.....
- Yu mekim wanem kain wok nau?
Bekim:.....
- Yu pinisim skul long wanem gret?
Bekim.....

- Krismas bilong yu.....
- Nem bilongyu:
- Adres:.....
Telipon Namba:.....
Fax Namba.....

Toksave: Bekim ol askim bilong Wantok, katim na salim i kam bek hariap long dispela adres: Askim bilong Wantok, P.O. Box 1982, BOROKO, NCD.

Dispela resis bai pas long Desemba 31, 1997.
Bai mipela tokaut long ol wina long Janueri 8, 1998.



Ragbi, Yes - mi laik stori long Ragbi

WATSON GABANA i raitim

Wanpela pilai planti manmeri i no inap abrusim. Ating, olgeta manmeri save dispela pilai. Ragbi em wanpela gutpela pilai tru. Sampela bilong yumi, yumi dai-hat sapota bilong ol pilai na klap long Ostrelia. Mi ken tingim, taim mi bin liklik manki, mi save harim ol bikpela manki save stori. Ragbi em pilai bilong ol man. Na soka em bilong ol meri.

Tru tumas, ragbi em wanpela naispela na strongpela pilai tru long kantri. Na em wok long kamap bikpela tru long olgeta hap.

Nau yumi kamap long arere bilong wanpela yia. Na larim yu sindaun na skelim wanem samting stret kamap long dispela taim.

Ragbi long kantri i bin stat wantaim tupela bodi. Papua Niugini Ragbi Futbol Lig (PNGRFL) na Nesenel Ragbi Lig (NRL).

PNGRFL em i han bilong supa lig resis. Na NRL em hap han bilong Ostrelia long ragbi lig resis. Tupela bodi wantaim i gat ol afiliat asosiesen na dispela bruk i bin kamap taim biknem nius kampani, News Limited i bin statim dispela Supa Lig resis. Tupela bodi wantaim i bin gat ol memba asosiesen bilong ol na bihainim wanem lo mama asosiesen i bin putim.

Larim yumi stori long PNGRFL pastaim.

PNGRFL em hap bilong Supa lig resis olsem mi tok pinis. Long dispela yia, PNGRFL i bin lukim planti sans tru. Nambawan samting em long ol bikman insait long bod. Presiden bilong PNGRFL bipo em Joe Keveame. Tasol em i bin lusim na go traim ileksen long asples bilong em. Olsem na nambatu bilong em; Kevin Murphy i bin go pas long dispela yia olsem siaman. Aninit long Murphy, em i gat bod ov darekta bilong em na ol i lukautim ofis bilong PNGRFL long Mosbi.

Long dispela yia, PNGRFL i bin i gat moa long tenpela memba

asosiesen. Ol dispela asosiesen em; Lae, Madang, Goroka, Hagen, Simbu, Wabag, Mendi, Tari, Kiunga, Mini/Banz, Ramu, Rabaul, Kimbe, Biala, Vanimo, Wewak, Capital City na Tabubil.

PNGRFL i bin ranim foapela bikpela resis long dispela yia.

Nambawan resis bilong dispela yia em Challenge kap resis. Foapela tim bilong hailens na Ramu i bin pilai insait long dispela resis. Ol tim husat i bin pilai long dispela taim em; Wabag Mioks, Ramu Crushers, Waghi Tumbe, Hagen Eagles, Lae Bombers, Kundiawa Warriors na Mendi Muruks. Mioks wantaim Tumbe i bin go long gren fainel na Tumbe i bin winim dispela taitel.

Bikpela ragbi lig resis long dispela yia em; SP Inta-siti kap salens. Ol taun husat i bin pilai insait long dispela yia SP Inta-siti resis em; Lae Bombers, Madang Marlins, Goroka Lahanis, Mendi Muruks, Kundiawa Warriors, Hagen Eagles, Rabaul Guria na Capital City Cowboys. Pilai i bin stap klostu tripela mun. Lae Bombers na Hagen Eagles i bin go insait long gren fainel na Eagles i bin winim dispela taitel. Bihain long dispela resis, PNGRFL bod i bin sindaun na rausim Kundiawa Warriors na Madang Marlins. Ol tok olsem Madang i nogat inap moni long pilai neks yia. Na Warriors, ol bod memba bilong PNGRFL i bin lukim olsem ol i save kirapim planti trabel olsem na ol stapim ol long pilai neks yia.


Nupela tim

Long 1998, tenpela tim bai pilai insait long SP kap resis. Ol nupela tim husat bai salens insait long dispela taim em; Kimbe, Tumbe, Mioks na Ramu Crushers. Ol joinim Bombers, Cowboys, Lahanis, Muruks, Guria na Eagles.

Bihain long dispela, PNGRFL i bin ranim narapela resis gen. Cambridge kap resis. Dispela em wanpela pilai bilong ol sempion



• Antap: Kaikai bilong win bilong ol. Lukim pasim bilong ol na yu yet i ken tingim . . . Aninit: Andrew Norman, senta bilong LBC Bombers i kisim John Jacobi Medal awod olsem wanpela strongpela na gutpela pilai long dispela sisen long han bilong Namba tu siaman bilong PNGRFL, John Numapo.



klap bilong wanwan afiliat senta. 16-pela tim i bin salens insait long dispela foa wik resis. Wanpela nupela tim bilong Rabaul ragbi lig resis, Vudal Cowboys i bin go insait long gren fainel wantaim Goroka Tarangau. Tarangau i bin bagarapim sindaun bilong ol yangpela blut bilong Vudal na winim dispela yia Cambridge kap salens.

Laspela resis bilong dispela yia em Winfil 9's tonamen we i bin kamap long Lae. Dispela tonamen i bin pulim 20 tim olgeta i kam long olgeta hap bilong kantri. Long dispela taim tu, PNGRFL na NRL i bin wanbel long bung wantaim neks yia. Olsem na ol tim bilong dispela tupela bodi i bin kamap long dispela taim. Mosbi Vipers i bin winim dispela taitel bihain long ol i bin winim Kimbe long gren fainel

Salens

Long dispela yia tu, PNGRFL i bin salim wanpela tim bilong em i go

pilai long Auklan, Nu Silan long Osenia kap salens. Ol boi bilong yumi i bin pilai gut tru tasol ol i bin lus long semi fainel.

Neks yia bai tupela wol kap resis bai stap long PNG na PNGRFL bai makim tu wanpela tim long i go pilai long Wol kap salens long England. Februari neks yia, PNGRFL bai salim wanpela tim i go pilai insait long Osenia wol 9's tonamen long Nu Silan.

Asosiesen

Lukluk long nesenel ragbi lig (NRL) long dispela yia. NRL i gat sevenpela bikpela asosiesen husat afiliat wantaim NRL. Ol em; Westen Hailens Kange, Goroka Nodondis, Sentrel Gaigais, Nondugul, Gumine Pythons, Mosbi Vipers na Morobe Mutrus Kundus.

Ol dispela asosiesen tu i bin holim bikpela tonamen bilong ol yet. Wanwan i gat moa long siksipela klap na ol i bin makim ol pilai bilong ol pilai insait long nesenel sempionsip bilong ol long Hagen. Wanwan asosiesen i bin salim tim bilong ol tu i kam pilai egensim Mosbi Vipers.


Mosbi Vipers, husat i save pilai insait long Queensland Channel 9 resis i no inap pilai neks sisen.

Dispela i bihainim sampela samting i no stret. Ol bikman bilong Vipers sapos long salim wanpela oditet moni ripot i go long ol bod bilong Queensland Channel 9 resis. Tasol ol i no bin mekim olsem. Long dispela as, ol bikman bilong Queensland Channel 9 i bin rausim ol long dispela resis.

Bipo long sisen i bin pinis, ol bikman bilong PNGRFL i bin sindaun wantaim ol bikman bilong NRL na pasim tok long kamapim wanpela resis neks yia. Ol bin wanbel olsem sapos NRL kam bung wantaim PNGRFL, bai Mosbi Vipers i gat sans long pilai insait long SP kap resis long neks yia.

Tasol, ol bod ov darektas bilong PRL i no mekim wanpela stretpela pasin hariap we PNGRFL i no save gut yet.

Tasol dispela bikpela pilai bilong yumi, Ragbi lig bai kamap strong tru neks yia sapos tupela bodi wantaim bung na kamapim wanpela resis neks yia. Save i stap long han bilong ol bos bilong tupela bodi wantaim.



• Siaman bilong PNGRFL Kevin Murphy (lephan) na siaman bilong NRL Tau Peruka pasim tok long kamapim wanpela resis neks yia.

Wewak sofbal resis kamap strong

ADDY LAVAKZ i raitim

SOFBAL resis long Wewak i wok long kamap, strong nau insait long raun tu bilong propa sisen.

I gat tripela divisen olgeta i salens nau long dispela resis, ol divisen ya em A gred divisen bilong man na meri wantaim, A risev divisen na B gred divisen tu i wankain.

Strongpela pilai tru long las wiken i bin kamap namel long tupela A gred tim bilong ol meri namel long Avis Gazelle na Kanai.

Tupela tim wantaim i bin taitim bun tru long wan aua 45 minit gem taim bilong tupela, tasol Gazelle i pundaun long las minit na Kanai i plai antap long ol na winim dispela pilai.

Gazelle husait i gat ol eksprens pilai i kamapim wanpela strongpela salens tru na i luk olsem ol inap tru long winim dispela pilai, tasol wanpela arapela samting i paulim tingting bilong ol long tingim pilai em long taim bek stopa bilong ol bal i brukim ai bilong en.

Birua ya i kamap taim pitsa bilong ol yet i tromoi bat na popaia long paitim bal na bek stopa i kirap nogut long ketsim dispela bal na bal i brukim sait ai bilong en.

Ating dispela liklik birua long faiv minit tasol long stat bilong pilai i brukim daun tingting bilong ol meri Gazelle long soim tru kala bilong ol long pilai.

Dispela birua i opim rot bilong kanai long kisim olgeta sans ol i gat long autim tiket bilong ol meri Gazelle long winim dispela pilai.

Christine Saiwal yangpela pawa pitsa bilong Kanai i givim hat taim stret long ol Gazelle long ol pawa tromoi bilong en.

Stail

Em i autim ol meri Gazelle husait i redi long paitim bal wantaim ol strongpela pawa tromoi bilong en.

Dispela i wanpela bilong ol bikpela samting i halivim tru ol karai long kisim gut win, na pilai antap long ol Gazelle long winim dispela pilai wantaim skoa 19-17 long fultaim.

Long ol arapela gem bilong ol wimens A gred namel long Wewak Eelers na Wewak Trempot tupela tim wantaim i soim ol sapota olsem tupela tim wantaim i gat stail na save bilong pilai na i wokim ol sapota i taitim bun na opim maus long sapot.

Wewak Trempot tim bilong Laura Martin i wanpela olupela tim tru insait long Wewak sofbal resis.

Tupela tim ya i bin dro long dispela gem 8-8 long fultaim. Arapela wimens A gred gem namel long ol gawi nogut Telecom na ol Water Rets bilong Water Bod long Wewak i wankain olsem tupela arapela poroman bilong tupela taim

tupela i dro long pinis bilong pilai 11-11.

I luk olsem ol gawi i les long kilim ol rat ya long winim dispela, gem, mekim na ol rat i pilai pilai wantaim ol i go na skoa i sarap 11-11 long fultaim.

A risev gem bilong ol meri namel long ol yangpela bilong Wharfies Heights na Difens i bin wanpela wansait gem tru taim ol yangpela bilong heights i wilwilim tru ol difens 24-4 bishain long fultaim.

Maski ol lain meri bilong Difens i senisim pitsa na kisim wanpela strongpela pitsa bilong ol, ol yangpela bilong Wharfies Heights i mekim save long paitim bal i go longwe moa long wokim planti hom ran long winim dispela pilai 24-4 long fultaim.

Wantok i painimaut tu olsem ol Wharfies Heights i no bin lusim wanpela gem bilong ol long raun nambawan.

Pilai

Ol i bin dro long tupela taim tasol long raun namba wan, dispela em namba tri gem ol long winim insait long raun namba tu.

Pitsa bilong Wharfies Heights Helen Yambin i tokim Wantok olsem olgeta pilai bilong ol i gutpela long wanem ol i bin win gut tru i kam.

Nau yet long poin lata bilong wimens A risev Divisen ol yet wantaim arapela tim Kanai i ron pas long ol arapela tim long divisen bilong ol.

Long arapela A risev gem bilong ol emri, Brandi i wilwilim Kaandi Hawks 15-5 na Wewak Hausbet i bagarapim ol Tarangau 19-8: na Kanai i sutim nus bilong Wewak Trempot 12-4: gem bilong ol man namel long Unaited na Tarangau long A gred divisen i wanpela naispela gem tru long wanem ol Unaited husait i gat ol bikman ya i pilai kaskas wantaim ol boi Tarangau na yu no inap bilap olsem ol i hevi tasol ol i gat spit i stap. Kain stail bilong ol long painim bal i go long we na ol i ken ronim i go hom, i halivim tru ol long winim dispela gem.

Dispela stail bilong paulim ol boi Tarangau na ol i ron isi tasol i go hom long winim dispela gem 14-5 long fultaim.

Mein gem bilong dispela wiken salens bilong mens A gred divisen i bun stap namel long ol pawa mangi yet, ol Elcom na ol sekuriti fos bilong yumi ol difens.

Pitsa

Dispela pilai i bin wanpela strongpela pilai tru long wanem mein gem tu na tupela tim wantaim i gat eksprens na save bilong pilai i stap long blut bilong tupela.

Elcom i gat strongpela pitsa

bilong en, wankain tu long ol soldia boi, man mekim na ol sapota i ting olsem tupela pitsa i mas tupela brata o tasol nogat ya, kain tromoi bal bilong tupela tasol i wankain.

Wanpela tim i no save givim sans long arapela long stap longpela taim long paitim bal nogat ya taim wanpela i go sanap long paitim bal arapela bai kamap tru long rausim em kwiktaim long kisim ples bilong en long paitim bal.

Mekim na ol sapota i bikmaus singaut long wanem tupela tim wantaim i kwik tru long olgeta pilai na muv bilong tupela long ketsim ol bal.

Ol pitsa tu ya kain tromoi bal bilong tupela i wokim na ol man i paul husait tim tru bai winim dispela, pilai.

Mekim i go na long las minit ol soldia boi i pairapim wanpela gas gan bilong ol, long salim wanpela boi bilong ol i go long haus long winim dispela gem long ol praivet mangi bilong Elcom, 6-5, long fultaim.

Presiden bilong Wewak sofbal Assoseasen Mista Nobert Bulmaris i tromoi bikpela tok-save i go aut long ol wanwan klab isnait long assoseasen long kamap wantaim ol tim bilong ol long salens insait long 4-pela dei tonamen bilong sofbal long dispela Krismas wiken.

Ol tim husait i laik stap insait long dispela tonamen i mas rejista K20 long pilai long winim wanpela Krismas Kap em WSA bai putim i kamaut long dispela 4-pela dei tonamen long Krismas wiken.

Olgeta pilai bai stat long tude na pinisim long Sande wantaim gren fainel, Mista Bulmaris i tokim Wantok Niuspepa.

Famili

Em i tok tu olsem sofbal em i wanpela pilai na olgeta famili memba i ken pilai na amamas long en, i no olsem ragbi na papa wan i pilai na mama wantaim pikini i sindaun na sapot, nogat ya olgeta i gat sans long pilai long divisen bilong ol yet.

Dispela gem em i gem bilong ol famili stret, na tu em i pilai bilong tingting na gutpela tingting man tasol inap long pilai insait long daimon bilong sofbal Bulmaris i tok.

Mista Bulmaris i pinisim tok-tok bilong en wantaim dispela hap toktok olsem ol klab gem bilong Wewak sofbal assosieasen bai malolo long dispela Kristmas na Niu Yia wik na olgeta bai bung gem long namba 17 de bilong Jenueri long nupela yia 1988 long pinisim raun tu bilong propa sisen bilong sofbal resis long Wewak.

Merry Krismas na Hepi Niu Yia i go long olgeta wan wan klab na mi luk fowet long lukim husait tru bai kamap sempion tim na winim dispela Krismas kap long dispela 4-pela dei tonamen long Krismas wiken yu, em i tok.

Bungim ol intanesenel pilai bilong yumi long dispela yia

WATSON GABANA i raitim

Long dispela yia, PNG i bin gat sampela pilai husat i bin i go pilai wantaim ol klap long ovasis. Ol i bin go pilai long kain kain spot. Tasol ol i bin kisim nem bilong kantri bilong yumi. Olsem na mi laikim yumi stori liklik long ol.

Ragbi:



• **Adrian Lam**- Kepten bilong Papua Niugini Kumuls long wol kap long England bipo, i no bin joinim PNG Kumuls long dispela yia. Tasol nau tok i bin orait pinis long kamapim wanpela resis long Ostrelia. Olsem na rot i op gen long Lam i kam joinim Kumuls neks yia.


Adrian i bin keptenim kombain tim bilong wol husat i bin pilai egensim Ostrelia long dispela yia.

Long dispela yia, Lam i bin pilai wanpela strongpela resis wantaim, Sydney City Roosters. Tim bilong em i bin mekim i go insait long semi fainel na lus. Long dispela yia, Lam i bin keptenim Queensland Stet ov Orijin tim.

Adrian Lam em bilong Kavieng. Papa bilong em miks German na Ostrelia.

• **David Westley**- David em wanpela strongpela Kumul pilai. Tasol long dispela yia, em i bin bungim hevi long bodi bilong em na i no bin pilai wantaim Kumuls. Tasol em i bin putim kamap wanpela strongpela pilai long Ostrelia wantaim klap bilong em; Canberra Raiders. Long dispela yia, Raiders i bin lus long semi fainel egensim Cronulla Sharks. David em bilong Nu Briten miks Ostrelia.

• **Bruce Mamando**- Dispela manki Bayer long Westen Hailens provins i bin pilai wantaim Adelaide Rams long dispela sisen. Tasol em i bin bungim tu sampela hevi wantaim bodi bilong em na i no bin pinisim gut sisen. Tasol Bruce em wanpela strongpela pilai bilong Kumuls.



• **Marcus Bai**- Resa manki bilong Bialla long Wes Nu Briten provins i bin mekim nem long dis-

pela yia. Em i bin kisim kontrak wantaim Gold Coast Chargers na opim ai bilong planti kosa long Ostrelia. Marcus i bin stap insait long kombain tim bilong wol husat i bin pilai egensim Ostrelia. Na tu helpim klap bilong em i go insait long semi fainel bilong ARL resis.

Marcus long neks yia bai joinim nupela tim bilong Ostrelia, Melbourne Swans. Em i bin kisim nupela kontrak pinis long hap na em lukluk tasol long statim nupela sisen. Em wanpela bilong ol pilai, kosa Bob Bennett lukluk long kisim i go insait long 1999 wol kap resis.



• **Elias Payo**- Manki bilong mapu kantri long Wabag em wanpela sempion ragbi pilai bilong PNG. Tasol long dispela yia, em i bin bungim kain kain hevi long bodi bilong em na em i no bin gut nem. Tasol em i bin keptenim Kumuls i go long Osenia salens long Nu Silan dispela yia. Dispela sisen, em i bin poromanim Mamando na tupela i bin pilai wantaim Adelaide Rams.

Nau yet, Elias i kam stap long ples na em i bin karim ol manki Moks mekim nem long Winfil 9's tonamen long Lae. Em bai go pas long Moks neks yia long SP kap resis.



• **Stanley Gene**- Dispela resa manki bilong Simbu em wanpela sempion manki nau long Hull, England. Em i wanpela feveret pilai bilong planti manmeri na sapota bilong Hull Kingstong Rovers ragbi klap. Olgeta taim em i save pilai, ol manmri i save kam wantaim bikpela namba long lukim em pilai. Kain gutpela na stail pilai bilong em i bin baim lewa bilong planti ragbi sapota long England.

Long dispela sisen, Stanley i bin winim planti awod tru. Em i bin winim prais bilong putim moa trai, bes hav-bek posisen na tu em i gat kolom long niuspepa long hap we em i save rait long en.

Yumi no save long wanem samting Stanley i wok long nau. Tasol luk olsem em bai stap yet long England long neks sisen.



• **John Okul**- Dispela manki Banz tu i wok long mekim nem wantaim Gene long England. EM nupela man long hap, olsem na yumi no klia tumias long wanem samting em i wok long mekim. Tasol PNG i gat wanpela gutpela Kumul pilai nau i save stap long hap. Taim em kam bek, bai Okul kisim moa eksprens wantaim em.

Ragbi Yunien:

• **Joe Pera**- Sori tru, PNG i bin lusim wanpela nambawan ambada bilong kantri long dispela yia. Pera, husat i bin pilai long Sri Lanka wantaim wanpela klap long hap i bin dai long dispela yia. Joe, em wanpela sempion man bilong ragbi yunien. Na em i bin apim nem bilong kantri long yunien. Tasol long dispela yia, sampela lain raskel long hap i bin sutim em dai.

PNG Ragbi yunien assosiesen bai misim Joe tru.

Soka:

• **Manis Lamond**- Soka sta bilong PNG, husat i wok long pilai raun long Ostrelia na Singapore. Manis em wanpela top straika bilong kantri. Em bilong Tubuserea, autsait tasol long Mosbi siti. Kain pilai na pasin bilong em i bin baim lewa bilong planti soka kosa na menesa long Ostrelia na Singapore.

Long dispela sisen, Manis i bin lusim olupela tim bilong em; Sydney United na i go pilai wantaim Wolongong Wolves. Tasol em i bin painim bagarap long bodi bilong em na Manis i no bin pinisim gut sisen.

Long namel bilong yia, Manis i bin winim wan mun kontrak wantaim wanpela klap long Singapore na em i bin go pilai long hap.

Long dispela taim, ol klap long hap i bin tingting long baim ol pilai bilong PNG.

Toktok bilong Manis long stap yet wantaim Wolongong Wolves i no stret yet. Na nau yet, Manis i no save bai em stap yet long Ostrelia o nogat.



Kain kain spot developmen long

Papua Niugini i gat moa long 4 milion manmeri. Sapos yumi glasim gut, bai yumi lukim olsem planti bilong dispela foa milion manmeri em ol yangpela man na meri aninit long 25 krimas. Olsem na sapos yumi tingting long developim dispela kantri bilong yumi, gavman bilong yumi mas tingting long helpim dispela ol yangpela manmeri. Wangepa gutpela rot gavman i ken mekim long kamapim gutpela sindaun namel long ol yangpela manmeri bilong tude em SPOT.

Gavman na spot

Spot em wangepa rot gavman bilong yumi i ken yusim long daunim kain kain hevi i wok long kamap long kantri olsem lo na oda, hevi bilong nogat wok, pasin bilong dring spak na smukim spak brus na planti moa.

Tasol sori tumas. Gavman bilong yumi long 23-pela krimas i go pinis i bin lus tingting olgeta long dispela. Qi i bin putim Spot stap aninit long kain kain dipatmen.

Long dispela yia, taim Bill Skate i bin kamap praim minista, em i bin putim Spot stap aninit long Hom Afeas na Yut. Na i no longtaim, em senisim gen na putim Spot aninit long dipatmen

Spot Ripota bilong Wantok, WATSON GABANA glasim kain kain spot developmen long Papua Niugini stat long Januari 1 i kam inap tude.

bilong Famili na Sios ministri.

Wangepa han bilong gavman husat save lukautim spot em PNG Spot Komisen. Dispela bodi i save stap namel long gavman na ol kain kain spot asosiesen insait long kantri. Na gavman i bin statim dispela long 1991. Dispela em taim PNG i bin go pas Saut Pasifik pilai long Mosbi na Lae.

Namel long dispela taim i kam inap tude, PNGSC i bin stap aninit long lukaut bilong nainpela minista olgeta. Long nambawan taim stret, memba bilong Bulolo, Mathew Bendum i bin stap het bilong PNGSC. Bihain long dispela, PNGSC i bin stap aninit long lukaut bilong Andrew Posai, memba bilong Kantrian-Gloucester, Nakikus Konga (Gazelle), Perry Zeipi (South Fly) na laspela memba long stap minista bilong dipatmen we spot stap aninit long en em, David Unagi, memba bilong Mosbi North East. Nau, bihain long 97 ileksen; Muki Taranupi, memba bilong Obura Waninara na nau minista bilong Edukesen, Kalsa na Saiens i bin stap minista olsem het bilong PNGSC. Taranupi i bin wangepa ki man husat i bin helpim PNG Spot federesen long painim moni long

helpim ol pilaia bilong yumi husat i bin stap long mini Saut Pasifik gem long Pago Pago, Westen Samoa. Stap wan mun tasol na memba bilong Kandep, Jimson Sauk i bin kisim ples bilong Taranupi. I no longtaim, olgeta samting i sanis. Gavman senisim na miksim nabaut ol ministri na ol minista. Spot nau karap long Hom Afeas na Yut i go long Famili na Sios.

Dispela em wangepa bikpela dipatmen tru bilong gavman na minista nau lukautim dispela dipatmen em; Titus Philemon, memba bilong Samarai Murua.

I nogat wangepa dipatmen stret bilong Spot long gavman bilong yumi. Spot i stap hagapmap tasol long ol arapela dipatmen klostu

23 krimas nau. Long dispela as, gavman i nogat wangepa gutpela plen na baset bilong spot developmen.

Sapos ol muvim Spot i go i kam olsem, dispela 85 pesen yangpela manmeri bilong kantri stap gut olsem wanem?

Spot oganaisesin long kantri

Insait long PNG, yumi gat kain kain oganaisesin husat i save lukautim na ranim ol wok developmen bilong spot. Kain grup olsem PNG Spot Komisen (PNGSC) yet, PNG Spot Federesen (PNGSF) na Nesenel Spot Institut (NSI). Dispela tripela bikpela bodi bilong spot

stap aninit tasol long ministri bilong Famili na Sios, we spot i stap insait long en.

PNGSC i bin mekim planti samting long helpim na developim spot insait long kantri. Wangepa bikpela wok ol i bin statim wantaim helpim bilong Trukai Industri em Trukai yut spot. Aninit long dispela program, bikman husat save go pas long program, Scott Vavine wantaim ol ofisel bilong em i bin raunim olgeta hap bilong kantri. Ol raun na lainim ol yangpela manmeri, spot kodineta na tim ofisel long kain kain spot, nupela ol lo na arapela sanis i wok long kamap long kain kain spot.

Narapela program em Coca Cola Pikinini Spot. Wantaim dispela program, ol pesman bilong PNGSC i bin go long ol skul na lainim ol long ol modifai spot program. PNGSC i bin mekim bikpela wok tru long dispela yia long kirapim nupela program na bringim i go aut long ol yangpela long ples, taun na siti.

PNGSF i em wangepa bodi tu bilong Spot, husat i save mekim wok isi long PNG tim i ken go pilai long ovasis. Sekreteri Jenerel bilong PNGSF, John Dawanicurra, nau wok poroman gut wantaim Sydney Olympiks Komiti na arapela ovasis spot oganaisesin. Aninit long PNGSF, olgeta tim husat save go pilai ovasis i save kisim helpim. Long dispela, PNGSF i bin helpim planti lain husat i bin go pilai long ovasis tonamen. Wangepa bilong dispela em; Mini Saut Pasifik Gems long Pago Pago, Westen Samoa. Na PNGSF i bin helpim tu wanwan spot grup olsem pawa na weightlifting, bodi biding, boksing, tenis na sampela moa.



• Uni volibal tim bilong Mosbi kompetise.



• Mosbi Skulbois soccer kompetisen.



• Riku Miler taitim bun long apim dispela hap ain.

PNGSF tu i save hatwok tru long painim sponsa long praiwet kampani na gavman dipatmen long salim ol tim i go pilai ovasis. Wangepa bikpela samting bai kamap long PNG, em Olympiks tos bai kam long kantri na bihain i go long Ostrelia bipo long Sydney 2000 Olympiks.

Dispela na planti arapela bikpela samting, PNGSF, aninit long lukaut bilong Dawanicurra stat long kirap. NSI em pulap long planti saveman bilong kain kain spot insait long kantri. Ol lain long Goroka i bin wok poroman gut tru wantaim PNGSC na PNGSF long lukautim kain kain trening na kosing klinik long dispela yia. Wangepa bilong dispela em tupela bikman bilong Wol Volibal federesen, long Turkey na Switelen husat i bin kam na givim kos long ol

Papua Niugini

kosa bilong yumi.

Nau ol lain long NSI i wok long kamap wantaim kain kain program long helpim ol gras ruts long kirapim spot program.

Spot Asosiesen

I no dispela tasol. Ol wanwan spoting grup long kantri i bin ranim planti nesanel tonamen. Na tu ol i bin go pilai insait long sampela intanesenel pilai.

Ol wanwan spot asosiesen olsem Papua Niugini futbol ragbi lig (PNGRFL), Papua Niugini futbol asosiesen (PNGFA), Nesanel Kriket bod), Papua Niugini sofbal federesen (PNGSF), PNG Etlitik yunien, PNG boksing asosiesen, PNG Bodi bilding federesen, PNG basketbal federesen, PNG volibal federesen, PNG weiltifting federesen na arapela moa. Olgeta dispela grup long dispela yia holim nesanel taitels bilong ol bihainim plen na kalenda bilong ol.

Larim yumi glasim wanwan spot asosiesen:

Ragbi lig - PNGRFL, het bilong supa lig bodi long kantri i bin ranim wanpela gutpela resis dispela. Dispela em SP Inta-siti na Cambridge kap salens. Pastaim long dispela em Challenge kap resis. PNGRFL i bin salim wanpela tim aninit long kosa, Bob Bennett i go pilai long Osenia kap salens long Nu Silan.

Ol bod memba PNGRFL aninit long lukaut bilong siaman, Kevin Murphy, ol i bin ranim wanpela gutpela sisen bilong pilai long dispela yia.

Murphy, husat i bin kisim ples bilong Joe Keveame olsem siaman i bin wok bung gut wantaim olgeta bod memba long ranim dispela ol resis. Siksipela senta i bin pilai insait long SP Inta-siti resis. Kundiawa Warriors, Mendi Muruks, Hagen Eagles, Lae Bombers, Rabaul Gurias, Madang Marlins, Capital City Cowboys na Goroka Lahanis. Hagen Eagles i bin winim Lae Bombers long gren fainel na winim dispela taitel.

Long Cambridge kap salens, Goroka Tarangau i bin winim ol sumatin bilong Vudal Agrikalsa yunivesiti.

Tripela tim husat i bin salens insait Challenge kap resis, Wahgi Tumbe, Enga Mioks na Ramu Crushers nau i stap long dro bilong neks yia SP kap resis.

Long olgeta ragbi sisen, PNGRFL i bin askim Nesanel ragbi lig bodi long tupela bung wantaim na kamap wanpela resis long neks yia. Tupela ragbi lig bodi, PNGRFL na NRL i bin wanbel. Olsem na ol tim bilong NRL i bin salens insait long

Nesanel Winfil 9's resis long Lae we Mosbi Vipers i bin winim dispela taitel. Ol i bin winim Kimbe.

Vipers husat i bin pilai long Queensland Channel 9 State kap i no bin mekim i go insait long fainel. Kirap nogut, ol bikman bilong Channel 9 rausim Vipers bihain long ol bos bilong Vipers i no bin givim ripot bilong moni i go long ol.

Nau Pot Mosbi ragbi lig i paul olgeta. Ol tim husat save pilai long PRL i no save long bihain taim bilong ol yet.

Tasol rot i op yet long Vipers i gen joinim SP kap resis neks yia.

Ol tim husat bai pilai long neks ia SP kap salens em: Bombers, Crushers, Mioks, Tumbe, Eagles, Lahanis, Cowboys, Muruks, Guria na Kimbe. PNGRFL i bin rausim Marlins na Warriors long neks yia sisen.

Soka - PNGFA, het bilong soka long kantri i bin lukim planti samting long dispela yia. Aninit long lukaut bilong presiden, Peter Mommers, nambatu Cathy Davani na Sekreteri/Tresera, Paul Pondo, soka sapota long kantri i bin lukim wanpela gutpela sisen. Tru olsem nogat nesanel sempionsip, tasol PNG i bin gat wanpela strongpela tim husat i bin trai lak long wol kap salens. Tasol yumi bin lus long Nu Silan na Fiji.

Yunivesiti soka klap bilong Mosbi i bin winim dispela yia nesanel klap sempionsip long Madang na kisim tok orait long i go pilai long Pan-Pasifik klap sempionsip long Sydney neks yia. Long junia divisen, Kaiapit i bin winim Anda 20 sempionsip long Wau i no long taim i go pinis. Kaiapit tu em sempion bilong Momase soka resis.

PNGFA kisim pinis wanpela gutpela nius i kam long Osenia Futbol Konfederesen (OFC) na FIFA, olsem ol bai sapotim soka long kantri wantaim K1 milion inap foapela yia.

Sofbal - Papua Niugini sofbal federesen, i bin lukim wanpela gutpela sisen gen dispela yia. Ol i bin holim nesanel sempionsip long Mosbi na klap sempionsip long Hagen. Bihain ol bikbos i bin makim wanpela tim bilong i go pilai long Brisbane Januari neks yia.

Basketbal - Wantaim BK44,000 helpim bilong Wills (PNG) Ltd, ol bikman bilong PNG Basketbal federesen i bin ranim foapela rijenel basketbal sempionsip na wanpela nesanel taitels long Hagen.

Aisa Nao, nesanel kosing darekta i bin go pas long helpim wanwan rijenel asosiesen long holim dispela tonamen. Momase basketbal tonamen i bin stap



long Wewak, Sauten long Popondeta, Hailans long Hagen na Ailans long Kavieng.

• Ol boi Amerika husat i kam raun long kantri olsem Spot Ambassadors. Ol lain bilong autim tok bilong God long spot.


Boksing - Long dispela yia, PNG Boksing yunien i bin lusim wanpela gutpela paitman bilong kantri. Howard Gere, wanpela strongpela boksa na gol medel wina long planti bikipela pait i bin dai bihain long wanpela ka eksiden autsait long Mosbi. Tasol i gat planti gutpela samting i bin kamap. Nesanel boksing taitel long Tomalinga bareks long Rabaul i bin pulim planti boksa long olgeta hap bilong kantri. Narapela gutpela samting tu em tupela boksa bilong yumi bai i go skul long Nesanel spot institut long Melbourne, Ostrelia.

Kriket - Papua Niugini brukim krekot na kisim tok orait long i go pilai insait long Wol yut kriket long Johannesbug, Saut Afrika, Januari neks yia. Ol bin winim Esia-Pasifik taitel na lus long Bangedesh long winim dispela sia long wol kap resis.

Ol arapela spot olsem volibal, hoki, netbal, tenis, taikwando, karate na arapela moa i bin holim sampela kain tonamen bilong ol long kantri na tu pilai insait long ovasis tonamen.



Dispela i no olgeta samting we i bin kamap long dispela yia. Tasol taim yupela ridim dispela sotpela stori, yupela ting wanem long spot developmen long kantri bilong yumi? Long mi yet, mi pilim olsem, gavman mas kamapim wanpela ministri bilong Spot yet long sapotim olgeta yangpela manmeri husat nau laik i go insait long kain kain pasin nogut na bagarapim kantri bilong yumi.

Sapos yupela i gat samting tok long mekim, rait i kam long Wantok Spot desk. Yusim adres i stap aninit long bek pes bilong Wantok.



• Mosbi tas kompetisen.

WANTOK SPOT



Askim long kamapim nesanel studen lig bodi

BIKPELA askim i go nau long kamapim wanpela nesanel studen ragbi lig bodi, we i ken kamapim bikpela pilai ragbi lig insait long olgeta skul long Papua Niugini.

Dispela askim i kam long presiden bilong Kiunga Studen Ragbi Lig, Ian Kakarere.

Mista Kakarere i tok wanpela we tasol long PNG i kamap wankain olsem ol nem lig kantri long wol em long skulim rul na stail bilong pilai long ol yangpela man o mangi taim ol i liklik yet. Na gutpela hap bilong statim dispela em long ol skul insait long kantri.

Mista Kakarere i tromoi tingting olsem nesanel studen ragbi lig em ol i ken brukim i go long tripela grup, bai ol i ken brukim gem bihainim krismas bilong ol mangi. Em long grup 1, 2 na 3.

Mista Kakarere i tok wanwan grup mas i gat eksekutiv bilong em yet, husat bai kamapim na mekim ol plen bihainim ineteres bilong wanwan grup.

Grup 1 bai lukluk long ol pikinini long gred 1 i go inap long gred 6. Grup 2 bai lukluk long program bilong ol studen long sekenderi studen long hai skul na ol vikesinel senta. Na grup 3 bai lukluk long studen bilong ol bikpela skul olsem long teknikel koles, yunivesiti na ol tisa koles.

Mista Kakarere i tok bikpela astingting bilong dispela em long tisim ragbi lig long ol studen taim ol i yangpela yet.


Em i tok planti bikman bilong Edukesen dipatmen na ol papamama i rait long komplek long bagarap em ol pikinini i ken kisim long pilai ragbi lig. Tasol em i tok ol i ken ogenaisim dispela resis bihainim tingting bilong em, sapos ol i senisim rul bilong pilai olsem bilong flag futbol na tas ragbi.

Dispela tupela gem i kisim sapot bilong ful intanesenel rul bilong gem we i nogat takel na skram we i ken givim pen long ol pilaia.

Mista Kakarere i tok taim olgeta samting i orait, ol intanesenel rul bilong pilai long sait bilong takel na skram i ken kamap taim ol studen i stap long ol sekenderi skul.

Tasol Mista Kakarere i tok wanpela samting nau em ol pipel i mas kam fowat na wok bung wantaim Papua Niugini Ragbi Futbol Lig (PNGRFL). Na sanapim wanpela nesanel studen ragbi lig bodi.

Em i tok narapela samting tu em long painim ol trupela hatwok administreta long skul level long ogenaisim ol kosa klinik na pilai bilong ol skul pikinini.



Kas bilong ol Kanai susa long Wewak

Ol mama wantaim susa na pikinini bilong Kanai sofbal tim bilong Wewak sofbal resis, husat i kirapim das na bagarapim sindaun bilong ol sore susa bilong Avis Gazelle 19-7 long bikpela gem, em i bin kamap long wik bipo long Krismas Wiken. Foto: Addy Lavaks.

Goroka Lahanis pilaia tokaut egensim ol Kumul selekta long wansait tumas

SAPE METTA i raitim

SAPOS Papua Niugini em i wanpela strongpela ragbi lig kantri long wol, na planti yangpela man i save komitim ol yet long pilai strong insait long dispela spot, na laik mekim nem bilong ol yet na kamap wantaim sans bilong pilai long nesanel tim (Kumul), planti taim ol opisal na nesanel selekta i save lukdaun long ol. Dispela ol strongpela toktok em David Sari, wanpela sinia ragbi lig na representetiv pilaia bilong Goroka Lahanis i bin autim long Wantok long Goroka las wik.

Sari i tok long wankain pasin em i bin pilai strong tru na i kam antap klostu long mak bilong inta-nesanel level long yia i go pinis. Tasol bikos long dispela wansait pasin na disen bilong ol selekta, ol i dropim em long las minit na pulim ol ovasis kontrak pilaia i

kam insait long nesanel skwat na kisim ples bilong em.

Sari i no wanbel long dispela pasin na em i tok planti ol pilaia inap long makim kantri bilong ol insait long Kumul tim. Tasol taim dispela sans i save kamap, ol opisal na selekta long nesanel level i save daunim ol na bagarapim sans bilong ol dispela gutpela pilaia.

Em i tok lukluk long ol ovasis kontrak pilaia, em i tru olsem ol i gat moa eksperiens, olsem na long dispela as opisal long nesanel bodi i save kisim ol i kam insait wan tu tasol long nesanel tim.

"Tasol i gat wankain ol pilaia tu i stap insait long kantri. Na ol inap long makim ol dispela gutpela pilaia bilong PNG long makim kantri," Sari i tok.

Em i tok i gutpela moa sapos ol opisal na selekta i kamap wantaim wanbel tingting na long taim bilong selektim ol pilaia, ol i mas singautim tu ol ovasis kontrak pilaia long

i kam antap long stap insait long ol nupela pilaia long i kam antap long patisipet insait long ol trial pilai. Na bihain long lukim pefomens bilong ol, ol selekta i ken wokim fainel seleksen na makim ol namba wan pilaia long makim kantri. Sari i tok sapos ol selektas i wok long yusim dispela sistem bilong makim ol ovasis kontrak pilaia i kam insait long Kumul tim, i luk olsem olgeta gutpela pilaia long kantri tu husat i laik i stap insait long Kumul tim tu i mas kisim ol kontrak long pilai long ovasis, na dispela bai i ken givim ol moa sans long kamap na representim kantri.

Long sem taim tu Sari i tok, ol kosa na selektas long wan wan ragbi lig senta insait long kantri tu i mas wok strong na toktok long mekim wei long pusim ol gutpela pilaia bilong ol i go insait long nesanel level. Planti taim ol i save geligeli na pasim maus bilong ol, na taim ol i wok long mekim

olsem, ol autstending pilaia bilong ol tu i save kisim taim nogut na i no save kamap long mak we ol i gat bikpela tingting long en.

"Ol pilaia i ken kilim skin long taim bilong pilai, tasol pawa i stap long ai bilong ol lokol selektas na kosa long toktok strong long strongim sait bilong ol long pusim ol gutpela pilaia bilong ol i go insait long nesanel skwat," Sari i tok.

Em i tok sapos ol dispela lokol selektas na kosa i no inap toktok na i stap slek tasol, hau bai ol i ekspektim ol namba wan pilaia bilong ol long kamap na tekpat insait long nesanel tim?

Sari i tok, long kampim namba wan nesanel tim, olgeta opisels long lokol na nesanel level i mas wanbel na wokbung wantaim. Sapos ol i no inap mekim olsem PNG bai i no inap tru long kamap wantaim wanpela gutpela risal insait long wol bilong ragbi lig.

LAIK BILONG WANWAN

Pot Mosbi Tas Futbol Referis Asosiesen bai lukautim Tas Futbol Resis namel long ol Setelmen long Pot Mosbi.

- * Em i Op bilong Man na Meri wantaim.
- * Nogat sas long fi - bilong Tim Rejisresin.
- * I gat Prais olsem Tropi bai i go long Win Tim bilong dispela resis.

Plis ringim Dennis Seeto long Pon: 325 5255 (Boroko Motors) sapos yu laik save moa long dispela resis.

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.